



Барча хьуннав Зумаритавал байран!

● Ххирасса лакрал жямат! ДакІнийхтуну Дагъусттаннал бусурмантурахь – циняв уссурваврахь ва ссурваврахь, барча тІий буру Зумаритавал байран!



№15
(2181)

20 АПРЕЛЬ 2023 ш.

РЕСПУБЛИКАЛУЛ ЖЯМАТИЙССА ВА СИЯСИЙССА ККАЗИТ

Кказит буклай бивкІссар 1917 ш.
Цунил итабакълан бивкІссар 1991ш.

Сергей Меликовлул дурккунни Дагъусттаннал Халкъуннал Мажлисрайнсса Рисала

Рисала дуккаврий гьурту хьунни Федерал Собраниялул вакилтал, влаьтарал республикалул ва муниципал органнал каялувчитал, федерал идарарттал, предприятиярттал бакІчитал, дуккаврил ва элмулул, культуралул ва спортрал ишккаккулт, хьунисри ва жагьилтал.

Сайки азараксса дагъусттанлул лайкъ хьунни хасьсса операциялий гьуртту шаврихлусса орденнан ва медаллан, миннал иширайну тасттикь бунни лайкъну бушиву ттаттахьал аьпалун ва цардан. Муния бувсунни цала

Сергей Меликов:
«Дагъусттанлултурал иширайну тасттикь бунни ттаттахьал цардан ва аьпалун лайкъну бушиву».



Сергей Меликовлул.

«Фронтран кумагран республикалул СВО-лул зоналийн тІайла дуркксар 5 азалий 180 тонна гуманитар кумаграл, диннал ккураннал ва ихІсандалул фондирдал чулухамигу хІсавну – 8,5 азарда тонна. Му регионнавату ца яла хьунмур ккаккьяр», – кунни республикалул каялувчинал.

«З ахІматшивурттагу къабурувгун, Дагъусттаннал дуллай бур хьычІунсса ккаккьяртту социал-экономикалул лябуккулуву», – кунни ванал.

Республикалул инвестициярттал программалул лагрулий ларгмур шинал хІасилайну буну бур 110 объект: 14 школа, 54 оьрчІал багъ, 11 спортрал объект, 17 – газралсса, 10 – шинал дузал баврилсса.

Республикалул БакІчинал тІимунийну, тамансса лябукку хьуну бур куклумур промышленностьраву, шяраваллил хозяйствалуву ва строительствалуву.

Сергей Меликовлул шан-сма бутГуйх бавчІунни реал секторданува цалчин дузал бу-

Сергей Меликов:
«Ларгсса шинал валовой регионал продукт лахь хьуссар 3%, му махьсса шиннардий хьусса рекордрал ккаккьяр».

Идарарттал фондру цІубуккан баву, ми давуртту дуван аьркинссар промышленностьраву, шяраваллил хозяйствалуву ва цаймигу арардаву.

Республикалий Аьрасатнал экономикалул хьунисса компанияртташалсса кооперацияртту утава буккан баву.

Аьршарал масьаларттавусса бакъакъавуртту духлаган даву.

2022 шинал чІиримур ва дянивмур бизнесрая налогру дучІан даву гьарза хьуну дур 1,3-лла. Дагъусттаннал БакІчинал ляличІисса къулагъас дунни бюджетрал системалувун налогру гьарзану дучІан дуллалаврих.

Ванал тапшур бунни контрольданул, надзорданул ва ихтиярду дуруччай органнал давуртту хьин чулиннай даххана дуван.

Дух дурксса къатрава бизан буллалисса иширттаву аьркинссар инсантурал ихтиярду лиян къадуллан, – кунни Сергей Меликовлул цала Рисалалуву. Ванал дакІнийн бувтунни Каспийскалий инсантал общежитиялува бизан буллалисса чІумал ми гьарца къини нигъачІавриву бивкІшиву.

«Инсантал кугъна хьусса къатрава бизан баврил программалул лагрулий 2023 шинал ахирданийннин цІусса минардайн бизан бувантІий бур сайки 1000 инсан ягу 300-лийсса кулпатру», – кунни региондалул бакІчинал.

Сайки 500 млн къурушур итадакынтІий бургъашину чІи-

Рисалалуву Сергей Меликовлул.
«Махьсса шинал мутгалий билаятран багъну бур ярагъгу кІунтихьну буручІан жула билаят ва жула бияла (суверенитет). Ми дуняялул лагрулийсса иширттаву шалла дуняялийх перхха тІутІи бунни жула игиттурал яхІ-намус», – кунни Республикалул БакІчинал.

Сергей Меликовлул дурккунни СВО-лул лагрулий Аьрасатнал Вирттаварал царду ларсминнал сияхІ:

НурмаІаммад ХІажимаІаммадов,
Асадуллагъ Абачев,
Энвер Набиев,
Руслан Кьурбанов,
Исрапил МахІаммадов,
Михаил Абрамченко,
Шамил МахІаммадов.
«Цуксса хІайпнугу, кувний



гьунарданул къиматну бацІайссар шала оьрму. Жура дуллай буру

жулла Ватандалухлу жанну кьурван дурминнал хажалат», – кунни

ван аьркинсса захІматми масьалартту:

Ахир 2 лаж. ➔

Сергей Меликовлул дурккунни Дагъусттаннал Халкъуннал Мажлисрайнсса Рисала



→ Дайдихъу 1 лаж.

римур ва дянивмур ишбажаранчишиврун кумагран – Сергей Меликов

Чиримур ва дянивмур ишбажаранчишивруву зий ур 315 азара инсан. Шикку дувайссар шанма бутлул ца ВРП-лул. Гьарза хъанай бур цалва цивпа давурттал дузал буллалимигу (самозанятые) – хIакъуну ми хIисавну ур 220 азара инсан.

Дагъусттаннал БакIчинал бувсунни информациялул давурттал агъамшивриягу.

Сергей Меликовлул був-

сунни аьркинну душиву лавайсса даражалийн диян дуван паччахIлугърал аппаратрал ва влаьстрал органнал давуртту.

Региондалул каялувчинал бусаврийну, гъашину къулагъас дувантIий бур муниципал къуллугъчигуран харжру ххи баврих. Мунийну бюхъантIий бур муниципал сакиншиннардийн давурттайн буцин лавайсса даражалул пишакартал.

Рисалалул хIакъиравусса гьарза-гьартасса бусаву дикIантIиссар хъиривмур номердани

Министрал дунни экономикалул давурттал 2022 шинал хIасиллу

Дагъусттаннал экономикалул ва территориал лябуккулул министр ХIажи Султановлул дунни 2022 шиналсса давурттал хIасиллу ва бувсунни гъашинумур шинайнсса масъалартта.

ХI. АБДИЛОВ

Министрал тIимунийну, 2022 шинал Дагъусттаннай бювхъуну бур экономикалулу хъун дуван хъунисса ккаккиартту, мукунна хъин чулиннай даххана дуван социал-экономикалул ккаккиарттугу.

– Дагъусттаннай бартдиргъуну диркIиссар инвестициярттал хъунисса проекту, миннуйну бювхъуссар дузал дуван цIусса зузи кIанттурду ва региондалул бюджетравун дучIан дуван ялун ххисса арцу. Миннуяр ххисшалагу, гъашину буллай байбихъуссар цаппара производствалул объектру, миннуягу тамансса кумаг хъуссар республикалул экономика лядуккан дуван, – кунни министрнал. Минэкономразвитиялул хъунаманал мукунма кIицI бунни 2022 шинал региондалул агъалинал ормулул даража лахъ бунну бушиву. Лахъ бунну бур паччахIлугърал къуллугъчитурал ва социал зузалтрал харжру, мукунма буллуну бур ялун ххи бувсса социал пособияртту.

ХIажи Султановлул бувсунни мукунма туризмалулу, промыш-



ХIажи Султанов

ленностьраву дурсса давурттал хIакъираву.

Гъашинусса шинал дандитанмунил хIакъираву министрнал бувсунни буллай байбишинтIий бушиву 160-нниха ливчусса социал объектру.

«Социал объектру буллантIиссар региондалул инвестициярттал программалул лагрулий. БувантIиссар школартту, яслирду ва оьрчIал багъру. Дагъусттаннай инвестпрограммартту бартдигъин хIадурну дур 20 млрд къурушру», – кунни пресс-конференциялий экономикалул министрнал.

Ларгсса тIалаткъини Дагъусттаннал БакIчи Сергей Меликов каялувчину дурсса совещаниялий ххал бивгъунни республикалий экзамену низамрай ва тIайлашиврий дулаврил хIакъиравусса масъалартту. Совещание дайдихълай, республикалул хъунаманал кIицI лавгунни Дагъусттаннал дуклаки оьрчIал Аьрасатнал олимпиадалий хъхъичIунсса кIанттурду бивгъушиву.

Экзамену низамрай ва сантирай дулуншиврул



П. РАМАЗАНОВА

– Аьйшат МахIаммадовал ва ПатIимат Самадовал Аьрасатнал лагрулийсса сийлийсса конкурсирттай хъхъичIунсса кIанттурду бивгъунни, ва иширвагу аьлтта чIалачIиссар жунма оьрчIан кIулшивуртту дулаврил даву сантирай рутан лавхъушиву, – увкунни ванал.

ЕГЭ-лул хIакъираву ванал бувсунни экзамену дуллантIисса пунктру видеонаблюдениялул дузалну бушиву,

районнал, шагъурдал хъуниминнайну тапшур бунни вай иширттал ялув бацIаву дуван. МуницIухва, ванал кIицI лавгунни даву оьрчIал психикалий зулму къахъунсса даражалийн дуван аьркиншиву, Дагъусттаннал Минздраврайн тапшур бунни ЕГЭ-рду дуллалисса ппурттуву школартту къуртал буллалиминах къулагъас дуван.

Ларгсса шинал ЕГЭ дулаврил хIасиллугу хIисавравун ларсун, гъашину цукунсса давуртту дурссарив бувсунни кIулшиву

дулаврил ва элмулул надзорданул федерал службалул хъунама Анзор Мурзаевлул. Ванал кIицI лавгунни шиная шинай экзамену дулаврил даву сантирайн дагълай душиву, ларгсса шинал бунияласса диялдакъашивуртту давриву ялун къалирчушиву. Дагъусттаннал кIулшиву дулаврил ва элмулул министр ЯхIия Бучаевлул бувсунни гъашину ЕГЭ-рду дуллаливу 12500 оьрчIал, ГИА-рду – 40000 азара оьрчIал. Бувсунни чIявуми выпускниктурал биологиялул, обществознаниялул ва химиялул экзамену язи дугъайшиву ва, ларгсса шинах бурувгун информатикалул экзамен дуллалимигу 21% гьарза хъушиву.

Экзамену дуллантIисса пунктирдай агъалинал мюхчаншиву дурччаву мурадрай дуллалимуния бувсунни Дагъусттаннал вивалрил иширттал министрнал хъиривчу Сергей Власовлул. Ванал кIицI лавгунни 1200 сотрудник низамрал ялув авцIуну бикIантIишиву. Энергетикалул хъунама Марат Шихаьлиевлул бувсунни энергетиктурал 79 бригада (180 инсан) хIадур бунну бушиву, иш багъарча, анаварсса мутгалий цумур бригада цумур пунктрайн гьанссарив ккаккан бунну бушиву. Цуллушиву дурччаврил министр Татьяна Белявал бувсунни гьарца пунктрай аьркинмунил дузалсса бригадартту зунтIишиву, аьркин багъан бюхайсса даруртту хIадур бунну бушиву, медициналул циняв зузалтран дуршиву даврил инструктор.

Экономика лядуккан даврил штабрал батIаврий

Апрельданул 17-ний ДР-лул ХIукуматрал Председательнал Оператив штабрал батIаву. Ххал бигълай бия кIива масъала: 2022-2023 шиннардил кIинтнил зурдардил чIун къуртал шаврил хIасиллу ва 2023-2024 шиннардил кIинтнил чIумуйн хIадур шаврил программа; тIайлану къазузисса закупкартту ва поставкартту дуллалимиттизаманнул журалийсса электрон реестрданийн лавсун, минная тIалав буллан закону бартдигъаву.



ХIукуматрал Председательнал бувсунни бунну, электричествовалул оборудование духдуккавийн бунну, мукунна заллугъру бакъасса сетъру чIярусса дунутIий ва шинал дайдихъулий, яла дяркъу думур чIумал, ток чIявуну ччучлай бунутIий, дагъусттанлул ливчIун бия шаппа чирахъру лахъан къахъанай, гъилишиву ва кIирисса шин дакъа.

«Хъуннасса къулагъас дикIан аьркинссар агъамсса объектирдах, яла-яла азархарнадах. Микку ток лещан къааьркинссар чансса хIаллайвагу», – кунни премьер-

нал. Мунал мукунма бувсунни аьркинну бушиву ресурсоснабжениялул идарарттал хъхъичIсса буржругу лахаран.

Масъалалул хIакъираву махъ лавхъунни ДР-лул энергетикалул ва тарифирттал министр Марат Шихаьлиевлул. Мунал бувсунни электричествовалул ва газораспределитель комплексирттал давуртавусса захIматшивурттая. Министрнал тIимунийну, Дагъусттаннал электричествовалул дур 37,5 азарда километра электропередачарттал ххалал, 35-110 кВ токрал 233 питаниялул центр ва 10 495

трансформатордал подстанция. Республика газрал шаллу дуллалиссар 107 газораспределитель станциялул. Газрал сетирдал лахъишиву хъанай дур 16,3 азарда километра, хIакъунисса къини 13 ГРС-рай хъуннасса кIушиву дур, газораспределитель сетъру дух дурккун дур сайки 40 процентрал.

Мунал личIину бувсунни МахIачкъалалин ПАО «Россети Северный Кавказ» ва «Газпром трансгаз Махачкала» идарарттал дурну диркIисса давурттаягу.

Министрнал энергетикалул комплексрал идарарттал каялувчитурахъ бунни дандитанмунил хIакъиравусса цаппара маслихатругу. ПАО «Россети Северный Кавказ» идаралул гендиректорнал хъиривчу – идаралул хъунама инженер Виктор Абаимовлул бувсунни гъашину январьданий чани лещан буллаварил сававрттая ва, мукунсса ишру къахъананшиврул, цукунсса давуртту дурну диркIиссарив.

Яла ихтилат бунни ООО «Газпром Межрегионгаз Махачкала» идаралул гендиректор Ризван Мурадовлул.

БатIаврий ххал бивгъунни тIайлану къазузисса закупкарттал ва поставкарттал вакилтал электрон журалул реестрданийн лахъан бунну, минная закондалул тIалавшинну бартдигъаву тIалавдан аьркиншиврул масъала. Му масъалалул хIакъираву махъ лавхъунни ДР-лул строительствалул, архитектуралул ва ЖКХ-лул министр Александр Нестеровлул.

ХIадур бувсар ХI. АБДИЛОВЛУЛ

Апрель зурул 18-ний Махачкьалалив Щиназуллал кичиравун, Украиннаву хасьсса аьралий иширттаву чувшиврий жан дуллусса, Цалчинмур Шувкратусса Хажиев Асхад яхъанай ивкисса кьатрачбан бавтун бия чявусса агьлу. Ва ахиратрал ххуллийн тйала уккун шин хъанахьисса кьини мармарчарил ула лачлай бия Чувшиврул ордендалун лайкь хьусса Асхадлул кьатрай.

Патимат РАМАЗАНОВА

Мармарчарил улттуй дия киягу уссил сурат: щинавун бюкьлакьисса душ ххассал буллай жан кьурван дурсса чивима Исламлулссагу. Исламлул бюкьлакьисса душ ххассал бувссия, цувама бивкьуллул хяппуртташа ххассал кьавхьуссия. Шяраваллил агьлу, чяххул, учительтал, оьрчал гьалмахтал буслай бур: «Жул итталу хъуни хьусса оьрчрур, буслай бусан кьавхьунсар цукун мяьрипат дусса, дакьру тиртусса, аьчухсса оьрчру бивкиссарив», – тий бия кувнайн кувнал яржа кьабитлай.

Мармарчарил улагу цакь дурну, зикригу бивхьуну мукьав вирттаврал ниттишал гьалгьа бувансса сант дагьуна. Оьрчал ппу Махаммад сагьну акьар. Муса тима арс школалий дуклай ур, шамуннава ца ливчун ур.

Саният Хажиева:

– На шичча арх бакьа оьрчал азарханалий зий бикайссияв, дан дуваймур дурну махь, мажал хьурча, лечайссияв шаппай оьрчру ци дуллай бурир ккаккан, хьинну ялув бавцуну бикайссияв. Асхадлул зума ту цалвагу кьаччан бикансса махь бавну бакьара, пиш тий акьа зума кьаахайссия. Гиччава ляличисса оьрч иклайва. Ванал учительница (34-мур школалий дуклай уссия) Раисат Нуровна ларсун бувкунни Асхадлул ххулчинмур классраву дуклай уний чирчусса ниттихасса сочинение. Ляличи Асхадлулмур сочинение ядурссия тий бия вайксса шиннардил мутталий, цувава ябацансса, итталун агьайсса оьрч уну тий. Цал эко-

Лакрал вирттал

Уссурваврал царду дусса ула цакь дунни

«Арснал дуллусса жанграл чарсса лирагу-кьаликкара»



Сержант разведки Гаджиев Асхад Магомедович награжден Орденом Мужества (посмертно)

номистнал кьулшивуртту ларсуна, яла, машинартту ххирашиврул, Автомобиль-ххуллурдал колледжравун кунку хьуна. Кьуртал бувайхту, цал кьану бакьар увкуна. Хьинну арми-

ялийн гьан ччай ия, военкоматрайн лаглай ия цува учара тий. Таний армиялийн кьабуцлай бияхха, кьавуцуна. Асхадгу дуклан увххуна ДГПУ-лул хужожествалул ва графикалул фа-

культетрайн. Дипломрал давриха зузисса чьумал оьвкуну военкоматрайн. Нагу бувчин бував медициналул комиссия буван гьан аьркиншиву, ттуйн ттуйн-ма военкомнал оьвкуну. Яла военкоматраяту арснал оьвкунни, вайннал на армиялийн гьан ан най ура, дипломрал даву кьуртал кьадурнура личан най дур тий, Дуллаймур бакьуйн дуккан кьадурну кьаритайсса ия, мунияту даву дяличан тий душиврул ялув кьуману ия, армиялийн ачин гьарарай ухьурчагу. Кива гьантлул дянив комиссиягу бувну, увцуна. Дачи шинава контракт цакь дурна, Калининградрай уссия. Ва ттул кьану бур тий ххарину ия, хьарачат бусса ия. Контрактрай унува армиялул Спорткомплексраву тренернугу зий уссия. Квартира булайхту, видеолый ккаккан буллай ия, ва балконни, ва залли тий. На ххари буванмуних хьуну иклайва. Кира шин хьуна отпуск кьабуцлай. Учлайхту, жул ххаришиврул дазу дакьая. Амма гьар кьини ацгийлва архал кьуллугь буллалими оьвтий бия, рахатну игьалаган итайсса иш бакьая. Ттун тамаша бивзуна, личину оьрмулул арснаяр хьунисса бакьанува, тай оьрчал арснайн буттал цагу тий гьалгьа буллалаву. Цува увсса кьини дурну лавгьиссия. Тания махь кьаккавкссар, акьассар...

Арснал бивкьуйн увкун ивкисса генералнал оьвчай, дакьивун кьувтуну ура тун иклай. Арсна бусласийни, гьармагу ванал инсаншиврия, дакьаьмал ххуйшиврия гьалгьа тун иклай. Ххиряя ванан бахшишру дуллан, ссайгьатру бачлан. Ванал дуллусса жанграл чарсса на лирагу-кьаликкара. Ва лачак цакь дувайсса брошьгу чурххая хьура кьабувара. «На ина

чунчав даврийн буккан кьабитанна, теплицарду бувну, вила уртту-тутлаха зунтиссара», – тун иклайва.

Уссурвал дуньяллия лагайхту, ттун Мусалсса буллан багьлай бия, ва чьаважагьил ия. Асхадлул хьумунил гьожу уккан увну ия, кьатлува кьатлув уклай акьая шаллусса зуруй. Ттун яхьиравун багьан аьркинну бия, ливчманалссавагу бан. Дакьинийхтуну барчаллагьрай бура, нава ттула дардирашал, кьовулушал навалу кьабивтминнай: даврий архал зузиссия, чьаххув-чьаххунай, гьан-маччаириннай. Инсантурал дакьурдил ххуйшиврул ххассал бунна. Хьаят дурцусса ванал дустал чьалай бия. Вайгур ттул тирхханну, ттула арсурвавря бусласиминнах вичи дишавур тирхханну. Асхад лавсун бувкисса чьумал, ттул кунттихьхун Чувшиврул орден дуллауна. Мяьлумну зат дакьинийвагу бакьар, амма ордендалул документру кьальявкьуна. Та аварасса ппурттуву баякьуну ливчхьуниссия тий ия генералгу. Утти Махачкьалаллал мэрнал цацанма оьвкуну, документругу булунттишиву баян бунни. Яхь булланна, дуньял дур дунийра, дуньяллул багьасса арсру бакьар. Вай оьрчру лечлай бивкисса багьравух занай, вайннал ша бивзний ша бизлай, вай шивахва бусса кунма кьуццу тунгу, яхь бувангу хьарачат буванна, букьавнугу чара бакьавхьукун.

Ялул ххигу бан. Захьматри ниттил кьовулул чьарав ссая-бунугу гьалгьа тун. Амма учинна, Щиназуллал кичираваллин уссурвал Хажиевхьал ца дизан ччисса агьулданул хьарачатгу, мурадгу дузрайн букканнав куну.

Зулайхат ТАХАКЬАЕВА

Жагьилтурал ккуррандалул хьунама Тамерлан Хажиевлул бусаврийн бувну, ифтар сакин давриву чялишса гьурттушинна дурну дур шагьурдай яла пар хъанахьисса жагьилтуралгу. Чявусса жагьилтал цивпагу бувкун бия гила-шилаха.

Хьирив кьинисса ифтар сакин дурну дия райондалул бакьчи Юсуп Махаммадовул ва ДР-лул Халкьуннал Мажлисрал депутат Марат Илиясовул.

Мубараксса Рамазан зурул барачатшиврия, Лайлатулкьабрилул хьхьунил караматшиврия бувсуни райондалул имам Мухаммад Саламовул. Зума итадакьин бувкьиннахь ялул нанисса Зумаритавал байрангу барча тий, Юсуп Махаммадовул увкунни:– Хьакьину, жула Ватандалул – Аьрасатнал, ялул хьуннасса нигьачьаву дирсса чьумал, агьамссар, агьали цацун бавтун, архал зумагу итадаркьуну, архал мизитравунгу занай

Дин, иман, ислам

Гьумук кира ифтар

Итни ва тталаткьинирдай лув-ялув Гьумук, биялсса агьлугу бавтун, хьунни кира ифтар. Итнийкини дия жагьилтурал ифтар – Лакрал райондалул жагьилтурал ккуррандалул ва «Инсан» фондрал цацгу хьадур дурсса.



бушиву. Жяматрай итадаркьусса зумалул ва бувсса чаклил барачат хьунмассар, цаннал дурсса дуаьлуяр чявуссаннал дурму-

нил бияла хьунмассар. Хьакьину жула гьарцаннал бакьравусса пикрирдугу, дакьиву дайсса дуаьгу аьмсса дур – хасьсса аьралий



операция кьуртал хьуну, жула чиваркь сагь-саламатну цала кулпатирттал ялул зана хьуннав тисса. Мукун хьуну лякьиннав чьясса мутталий.

– Ттул дакьивун хьуннасса ххаришиву дагьунни шикку чявусса дуккавил зузалт кьавккун. Цанчирча хьун хъанахьисса никирал дянив хьхьичьа-хьхьичьа шурматрай бикан лайкьми инсантал цалчин нину-ппу, хьирив учительтал буну тий. Жу, рувхьанийсса идарарттал зузалт, тьурча, анжагь миннал кумагчи-

таллу, – увкунни Дарбант шагьрулул имам Мухаммад Майрамовул.

Зума итадакьин бувкьиннахь ялул нанисса байран барча дунни Марат Илиясовулугу.

Шиккува кьичь бан, кьирагу кьинисса ифтарду унгу-унгусса байранну хьунни оьрчан. Вайннан тивтуну бия ссупра личину чьятир бившуну. Чьяруми бахшишругу дарчуна миннай.

Зума итадаркьуну махь чиваркь лавгуна Гьумучиял мизитравун таравихь чаклийн.

Дин, иман, ислам

Зул дуардахъхъун жавабру дулуннав!



Ххирасса лакрал жямат!
ДакИнийхтуну Дагъусттан-
нал бусурмантурахъ – циняв
уссурваврахъ ва ссурваврахъ бар-
ча тИий буру Зумаритавал байран!

Циняв бусурманнан мубараксса
Рамазан барз къуртал хъушиву
исват буллалисса ва ххаллилсса
байрандалушчал гьарца дагъуст-
танлувнал къушлийн духханнав

Зумаритаврил къини



Зумаритаврил Эдрал къи-
ни – хъинну ххирасса къи-
нир. ХIатта, Аллагу Тааьлал
Алжан ва къинир ляхан був-
са, Алжаннавусса яла хъунмур
мурхъ ва къинир бившусса.

Жабраил малаик ваИшиви-
рийн ихтияр увсса къинири. Му-
нивусса фазиларду, хъиншивурт-
ту чIаруссар. Му къини хъинсса
аьмал баву, Аллагъ чIявуну кIицI

лагаву хъинссар. Дуаьлукъхъун
жаваб дулайсса, бунагъру шю-
шайсса, Аллагъ цимилийну ур-
гайсса къинир. Му хъхъуну, баргъ
лавгун махъ, Эдрал чак буллан-
нин, кIичIирттаву, мизитирт-
таву, къатраву, чув-бухъурчагу,
такбирду бишавугу суннатссар,
баянну оьвкуну. Эдрал хъхъу
дуркIувкун, гьарца ливтIусса
муьминтурал рухIру, ссаврун-

ххаришиву, талихI-тирхханну,
паракъатшиву ва барачат. Вих-
ну буру исламрал лавайсса дара-
жалул рувхIанийсса ххазинартту
кумагну хъуншиврийн жулва жа-
матрал имандалул даража лавай
бавриву, миллатирттал дянив
аслахIшиву, хIурмат-бусравшиву
цIакъ шавриву. Шуллуну-сагъну
зана хъуннав Украиннал аьрши
неонацизмалуца марцI дулла-
лисса жулва вирттал.

Бусурмантал – дакъаврил
ва ччаврил умматри. Ис-
лам – цинярда элмурдал, гьарца
хъинмунил дайдихъур, хъиншив-
рул гьанур. Исламрал рукнур-
дал мукьилчинмур рукну Рама-
зан зуруй зума дугъавур. Муни-
яту, гьар цилла шартIирдашчал,
рукнурдашчал, адабиртташчал
къамул хъунсса кушуй, жува
хIарачат барду Рамазан барз зу-
марду дугълай, Аллагнаха эба-
дат дуллай, хъиншиву, хъинба-
лартту буллай гьан буван. Зу дур-
гъуцири зумарду Аллагнал къа-
мул дуваннав, зул дуардахъхъун
жавабру дулуннав. ЯлунчIингу
Рамазан зурул хIурмат буруч-
чин, Аллагнаха эбадат дуллан
шуллушиву дулуннав!

ная духччинийн лирккун, цалла
къатрал лагма щядиркIун, лаг-
мара ккуранну дурну, оьвтIун
дикIайссар тIар, инсантуран
къабаярчагу: «Жугу, зу кунма,
дуниялий вай къатрал, ми хъу-
слил заллухъруну бивкIссару,
жугу дакIинийн бичара, жуклу-
ну цадакъагу бувара, жул гьат-
тайн зияратту бувара, дуаь ду-
вара, жунгу жува бувсса хъин-
сса аьмал бакъа къалявкъунни»,
– тIий. Му къини, ливтIуминнал
гьаттайн зияратту бивну, минна-
яту цадакъагу бивну, ххуйсса ян-
нагу ларххун, ххуйсса хIалалсса
дукра дурну, кулпатрангу, махъ-
миннангу аваданшивугу дурну,
кувнначIан кув зияратрайгу лав-
гун, хIалалшивугу ласаву хъин-
ссар, суннатссар.

«НасихIатул-аьвам» тIисса
луттирай дур укунсса чичру:
«Хъус марцI дуван хъуслий за-
кат ялув бувсса кунма, чурх
марцI буван, зумалувусса диял-
дакъашивуртту кIучI дуван, зума
АллагначIа къамулну лякъин,
зумаритавал ссахIгу ялув був-
ссар. Инсаннал дургъусса зума
лукъчи-ссавнил дянив дарцIуну
дикIайссар, ссахI букканнин
ссавруннайн къалахълай».

Къуръан жува махIаттал буллалисса караматшивур

Къуръан хъанахъиссар аьршарай яла бюхттулмур ва ккалакки-
мур лу. Ганий буссар аьшуйн шусса ишру ва элмийсса ахттар-
шиннарду. Къуръан ккалаккийни, Каши ххисса Заннаясса нигъу
дагъай къюкIливун, имангу цIакъ шай. Къуръан жува махIаттал
буллалисса караматшивур.

Ялавай кIицI лавгун буссар Къуръандалий жавабру дусса цап-
парасса суаллу.



- – Ссавния ливксса цуми луттирда ялув буссар Къуръандалий?
- Таврат, Забур, Инжил, Ибрагъим ва Муса идавстурал кюр-шант.
- – Цуми сура буссар Къуръандалий?
- 114 сура.
- – Цумари цинявпагу идавстурал рувхIанийсса шайх?
- НухI Идавс.
- – Цуми аят дуссар Къуръандалий?
- 6236.
- – Цуми махъ буссар муний?
- 77439.
- – Цуми хIарп дуссар Къуръандалий?
- 323015.
- – Цумур суралул уручла-чиссар инсан Даджалул оьшивруша?
- «Аль-Кахф» суралул.
- – Цумил кIицI дурну дуссар Къуръандалий МухIаммад Идавсил (с. аь.с.) цIа?
- Мукъийлла.
- – Цумур сурари яла лахъимур?
- Сура «аль-Бакъара».
- – Цумур махъри яла лахъимур?
- Анулзимукумаха (сура «Худ», аят 28).
- – Къуръандалий яла чIявуну тикрал хъанахъимур цир?
- Аллагнал цIа – 2640-лийлла.
- – Цумурди Къуръандалий яла лахъимур аят?
- 282-мур аят, «Дин».
- – Цумурди яла кутIамур сура?
- Сура «аль-Кавсар», ганий дуссар шанна аят.
- – Цумур суралий дуссар Аллагнал цIа гьарца аятрай кIицI лаглай?
- «Аль-Мужадлат» суралий.
- – Цумурди Идавсийн цалчин ливкми сура?
- Сура «аль-Аьлакъ».
- – Цумурди яла бюхттулмур сура?
- Сура «аль-ФатихIа».
- – Цумур суралия лихъайссар жин, му шаппа ккаларча?
- «Аль-Бакъара» суралия.
- – Цумур сура хъанахъиссар Къуръандалул бакIну?
- Сура «аль-Бакъара».
- – Цумурди аятирттаву яла лайкъмур?
- Аят «аль-Курси» – «аль-Бакъара» суралул 255-мур аят.
- – Цумур сура къуртал хъанахъиссар кIия Идавс-нал цIардайну?
- Сура «аль-Аля».
- – Цухъанахъиссар Къуръан лахъхъин буллалиминнал шайхну?
- Ибн Жарир Табари.
- – Цумил кIицI лавгун буссар Къуръандалий Таврат ва Инжил?
- Таврат – 19-лва, Инжил – 12-лва.
- – Цуми лелуххантрая бувсун буссар Къуръандалий?
- ХъатIу (сура «аль-Маида», 31-мур аят), духъажари (сура «ан-Намль», 20-мур аят), ххюнчIа (сура «аль-Бакъара», 57-мур аят).
- – Цуми бутIа буссар Къуръандалий?
- 30.
- – Цуми сура ливкссар Маккалий?
- 85.
- – Цуми сура ливкссар Мадиалий?
- 29.
- – Цуми кIунтI буссар Къуръандалийсса хIарпирдал ялув?
- 1025030.
- – Цумур сура хъанахъиссар Къуръандалул ххярагъалану?
- Сура «аль-Залзлат».
- – Цумил кIицI ларгун дуссар Къуръандалий ва дуниял ва Абадул дуниял?
- КIирагу дуниял кIицI ларгун дуссар 115-лва.
- – Цумил кIицI лавгун буссар Къуръандалий Алжан?
- 137-лва.
- – Цумур сура таржума байссар «Малаик» тIисса мяъналий?
- Сура «Фатир».
- – Цумур сура байбихълахъиссар Аллагнал цIания?
- Сура «ар-РахIман».
- – Цуми сурардан дуссар идавстурал цIарду?
- «Юнус», «Худ», «Юсуф», «Ибрагъим», «НухI» ва «МухIаммад».
- «Ассалам» кказитрая хIадур буссар Зулайхат ТАХАКЪАЕВАЛ

Шаввал зуруйгу хъинмуния

Зумаритавал барз къуртал
хъусса къини, бусурманнал
календарьданийн бивну, бай-
бихълай бур Шаввал барз.

Ва зуруйгу ряхва гьантлий-
сса зума дургъуну хъинссар
тIар. Кувнил хъирив кув ни-
замрай ряхва гьантлийсса зума
дугъарча хъинссар тIар, личIи-
личIину ца-ца къини дугълангу
бучIиссар тIар. Рамазан зуруй
зума лях лирчIиминнангу шав-
вал зуруй хъирив лахъарча хъин-
ссар тIар. МухIаммад Идавсил
(с. аь.с.) увкуну бур : «Рамазан
зуруй ва Шаввал зурул ряхва
гьантлий зума дургъума оьрму-
лун зума дургъуну ивкIманаха
лашантIиссар» (Муслим, Абу
Давуд, Нисаи).

ХIадур буссар
П. РАМАЗАНОВАЛ



Дин, иман, ислам

Дарбантливсса ифтар ва фонтаннал шоу

Дарбантливсса, Аьрасатнаву яла хьуннамур фонтандалучИсса, ифтарданий 35 азара инсан гьуртту хушиву баян бунни республикалул Муфтиятрал.

П. РАМАЗАНОВА

ПаччахИлугьрал кьуллугьчитал, жаматийсса ишккакулт, спортсментал, туристал гьуртту хьусса ва ифтар бавтИцириннал дакИурдиву ххуйсса, хьамакьабитансса асарду кьабивтсса хушиву буслай, чичлай бур социал се-

тирдай. Зувиллий ххюазара инсаннал хьхьичИ зума итадакьинсса ччатИ бишин бигьасса даву дакьархха. Ваниха зузиминнал бувсунни пулавран шанна тонна ппиринжрал ва дикИул аркин дагышиву. Ряхтурша волонтер ивкИун ур кумаг буллау. Ифтарданий гьуртту хьунни дуниял-

лийх ца ларгсса, нашидру учайсса Мусттапа Атеф. Програма ярг дуван дия фонтандалул шоу. БавтИцири барча буллалисса махь лахьлай, шагьрулул хьунама Рустамбаг ПирмаИаммадовлул кИицИ лавгунни Рамазан барз агьалинал хасиятру ххуй дуваврил, хьинбаларттал, хьиншивурттал ва рахИму-цимилул барз бушиву, Дарбантливгу агьали, миллатру, динну личИи кьадуллай, бавкьуну, нахИуну яхьанай бушиву, шаннагу диндалул хИурматгу бушиву.

«Цайми региональная бувкИсса хьамаллуран жулла рувхИанийсса культура ккаккан дуван бьовхьунни», – увкунни Дарбантуллал пресс-службалул вакилнал. Мероприятие кьуртал дурна фейерверкрайну.

ЦувкИуллал цалчинсса ифтар

Апрель зурул 16-ний Цалчинмур ЦувкИуллал шьраваллил Аагьду бавтИун бия МахИачкьалалив «Шунудагь» тИсса банкетру бай залданувун ца ссупралух зумарду итадакьин. Ва шьраваллил тарихраву цалчинсса ифтар хьанай дур, ванил сиптачигу ур шьраваллил имам Аьлиев Муса. Ванал бувсунни, шьравунир шагьрулий чИявусса цувкИул яхьанай бухьувкун, пикри ца бувну, ифтар шагьрулий дувансса хИукму бувшиву.



Ниттихъансса ва шахъаннинсса

Ларгсса нюжмаркьини МахИачкьалалив «Кегельбан» банкетный залдануву хьунни хасьсса аьралий операциялий ливтИуминнал ниттихъансса ва шахъаннинсса ифтар.

Зулайхат ТАХАКЪАЕВА

Му сакин дурну дия Дагьусттаннал муфтинал кулпат ва маслихатчи Айна ХИамзатовал сипталийну, Муфтиятрал ДР-лул Культуралул министрствалул шал чачИуну. Миккун бувкИун бия ххюцалваксса хьамитайпа, «Сила матерей» ккурандалул вакилтал.



тилатру хьунни.

Дагьусттаннал Муфтиятра-чИсса «Гьидаят» тИсса хьаннил отделданул хорданул шаллу дунни нашидру. Дурххунни

МахИачкьала шагьрулул ттучаннал чулухасса бахшишру.

Ифтарданийн бувкИми барчаллаграй бия мунил сакиншинначитурайн.

Цуссалакрал райондалия

Мюхтажминнансса ка-кумаг

Мубараксса Рамазан зурул гьантрай цала ца кИул хьуну кьачИсса меценатнал Цуссалакрал райондалул жьаматрайх дарчИунни 10 тонна иникьалттул.

Ва инсаннал цала чулуха ЦуссачИуртташиял, Шущиннал ва Аьхьардал жьаматирттайх бачИин тИайла бувккунни 25 килорду дусса 400 чувал иникьалттул.

Цуссалакрал райондалул шьраваллил администрациярт-

тал зузалтрал кумаграйну, Зумаритавал байрандалун хасну бачИлачИсса иникьалттул чуваллу биян бунни кумаграх мюхтажшиву дусса кулпатиртгачИан.

Шиккува кИицИ лаган, цала ца кИул хьуну кьачИсса меце-

натнал гьарца шинал Зумаритавал байрандалун хасну райондалул жьаматран цала чулухасса чирилунсса кумаг бай. Ларгсса шиналул ванал жьаматрайх бавчИуна ппиринжрал чуваллу. Райондалул администрация дакИнийхтуну барчаллагь тИий бур ва бигьа бакьасса ппурттуву райондалул жьаматран жула ватанлувал бувсса кумаграхлу.

ХИакьсса патриот

Махьсса ппурттуву гьарза хьанай бур СВО-лий хушрай гьуртту хьун ччИсса жагьилтал. Циньянналгу мурад, неонацизма дух дурну, чИярусса шиннардий обьбалартту бухИлай бивкИсса инсантал мурахас бувну, ххувшаву ласаву дур.



Гьай-гьай, паракьатну бакьар Украиннал аьршарай нанисса хасьсса операциялий гьуртту хьун нанисса аьралитал тИайла буклакисса мачча-гьанми. Ва ххуллухь хушрай СВО-лий гьуртту хьун нанисса аьраличу ур ЦуссачИуртташиял шьравасса Мухтар ОьмарасхИабов. Циньяннан эьратрансса бур Мух-

тар тарбия увсса нину-ппу. Мухтардул ппу ОьмарасхИаб чИярусса шиннардий зий уссия райондалул виваллил иширттал отделданий. Кьуллугьрал буржру биттур буллалисса кьсса хИаллай ва-

нал царагу ай лачИунсса шилтагьшиву дурну дакьар. Укунасса ур ОьмарасхИаблул арс Мухтаргу – дугьрИсса, кьянкьа-кьурчИсса хасият дусса.

Мухтардул кьуртал бувну бур ДГУ-лул юридий факультет. Дуккаву кьуртал дурну махь увххун ур райондалул ОМВД-лийн.

ХИакьину ва циньяннан эьратранну биттур буллау ур цала аьральной бурж.

ХИадур бувссар Имара САИДОВАЛ

СЛУЖБА ПО КОНТРАКТУ В ООУРОЖЕННЫХ СИЛАХ

НАМ ВЫПАЛА ДОЛЯ СВЯТА - В ЖЕСТОКОЙ БОРЬБЕ ПОБЕДИТЬ ФАШИСТСКИХ СТЕВЕРНИКОВ СЯЯ ГРОЗИТ НАШЕ СОЛНЦЕ ЗАТМИТЬ...

Э.Калиев

МОЁ ДЕЛО

CONTRACT.MIL.RU
8 (8722) 68-16-08

ПатИмат РАМАЗАНОВА

Дайдирхьуна мероприятие Кьурандалул аятирттая. ЦувкИуллал Жьаматийсса советрал хьунама, профессор МахИаммадбаг ХИусайхановлул, бавтИцири барча буллау, кИицИ лавгунни, жагь баласса ковидрал пандемия сававну, жагьгу цайми дайшиш-рурду хьуну, цИувкИуллал жьамат чачИун батИинсса иш кьавхьушиву махьсса шиннардий. Ккуллал райондалул имам МухИаммад Маннар Бариевлул цалва ихтилатраву чИурчИав дунни диндалул кьимат бусса, исламрал ххуллу-ххуттайх нанисса жагьилтал бушиврийну-гу шьраваллил агьулданул оьрму хьхьичИунмай хьанахьшиврий. Шьраваллил администрациялул хьунама МахИаммад-Расул Илдаровлул, динчи МахИаммад-Рамазан Кьурбановлул, активисттал МахИаммад Юнусовлул, ОьрбакИай МахИаммадовлул, ХИажимурад Исьяевлул, Мурад Халимбаговлул бувсунни цуку-цукунсса давуртту дуван дакИний буссарив шьраваллил рувхИанийсса культура ва ирххазина ябаву мурадрай.

ЧИяву ифтарданийн бавтИцириннаву мюршисса оьрчИругу. Вайннансса викторинагу ХИадур дурну дия ифтардануха зузиминнал. ХИадур дурну дия оьрчИру ххари бувансса бахшишругу. Мюршисса оьрчИру. имамнал лагма лавгун, диндалул кИулшивуртту ккаккан дуллалисса лахИзава ссал кьабагьая! Имамнал Барчаллагьрал чагьарду буллауна цала дуллалимунищИун кабавкьуну, мукьуйну, иширайну чИарав бацИлацИсса инсантуран.

Утти ифтарданий гьуртту хьуниннал цаппара пикрирдугу.

Супиян Оьмаров:

– Ттул хьуннасса ххаришиву дур, шьраваллил жагьилтураву дурккусса, чантИ увкусса, исламрал ххуллу-ххуттайх нанисса, цувкИуллал ххуй-ххуйсса аьдарту ядуллау, ялун наниминнангу лахьхьин дуллалисса мадарасса бушиву чИалай. ЦувкИул гьар ишираву итхьавхьсар, дуллалимуниву хьхьичИунну гьуртту шайссар. Ва базилуху ккаккан бунни исламрал хИурмат лахьсса бушиву. Жува уттиния тийнмайгу бьухьийсса кьсса хИарачат буванну мюнатпасса давуртту дуван.

ПатИмат Зиркьуева:

– На барчаллагь тИий бура ва зал буллусса Оьмаров Жамалуттинуйн. Ванал кулпат Аьишатлулу, бунагьирттал аьпа баннав, ххуйсса хьамитайпа бикИайва, цувкИуллал тамансса мероприятияртту ва залдануву дувайссия. Навагу ва ифтардануха зузисса сакиншиндарул комитетраву бухьувкун, ттула буржну чИалай бура ва даву лавайсса даражалий дуван хИарачатрай бивкИминнахь барчаллагь учин. Ссят ацИуннийва ва залданувун бавтИун, гьирарай кумаг буллау бивкИунни, вай жагьилсса оьрчИру, дихьлай, дукьлай, хИала бувххунни. Ва ифтарданул барачат шалвагу шарнил жьаматрайн бияннав тИий бура. БувкИцириннайн барчаллагьрай бура, жува чачИун батИин шайсса, кувнал кув бувгьусса, диндалул хИурмат бусса бушиву ккаккан буваврихлу. ЯлунчИингу зумарду дугьлан цИуллушиву дулуннав, дурьгуцириннал зумарду Аллагьу Таабьланал кьамул даннав!

Жулагулданул буттайхчин-сса нясав нанисса дур Мухаммад идавсил (уруччин-нав цув Заннал) яла ххирамур душ Патиматлул ва мукьилчинма халипа Аьлил арснаяту Хусайннуяту. Патиматлул киягу арсная (кишц увсса Хусайннуя ва мунал уссу Хасаннуя) бивзсса наслулуцун цаьк дурну дур сайидтал тисса титул.

Хусайннул агьлу дин диншин Дагьусттаннайн бучлаву, бусалалул тимунийн буну, хьуну дур VIII ттуршукулий, халипа Абу-Муслиннул заманнай. Муния шинмай, Дагьусттан оьруснал цайнма мюти бивсса чумалнин, жул тухумран булун ккаккан буну бивкун бур аьраьлил давлаулу ххюва бутлул ца бутла, Шамиллул заманнай му бутла бачайва жул тухумраясса 72 нагьдисса инсаннайх.

Ттул буттал Жамалуттиннул ца, хьинну зат килсса алимчу ва мубарак хисаврай, машгьур хьуну дия бусурманнал дунияллийх. Жагьилний, элму лахьлай, му ивну ур Кьапкьазуллал чиявусса кьанттурдайн, кил хьуну ивкун ур ми халкьуннал багьу-бизулушал ва аьдат-эбадатиртталашал, мунал ххуйну килулу бия аьраб, парс ва татар маз, вайми, Дагьусттаннал сайки циняв, мазру кьахисавну.

Чавану унава ппу увххун ивкун ур Гьази-Гьумучиял ва Кураллал хан Асланнучан кьуллугьрайн секретарьну. Хатта цува залусса мулкирдаь Аслан-ханнал мунал ца куну дулуну диркун дур шанна хьунисса шярвалу. Амма, чун ларгун, ханнал ичлаллил чюлушивуртту ва хьуншивуртту цанна килу дизлан диркуну, мунал пикри буну бур, гьарзатту кьадиртун, та чумалсса шайх Ярагьиял Мухаммадлулчан гьан, танаяту цайнна тарикьатрал вирд кьамул даншиврул. Нани ххуллий мунал ацан багьну бур ца хьинну мискинсса, амма хьиншиврул зумаувицусса инсанна-ча. Та инсаннал ичлаллил кьанатсса тагьар ххал хьусса Жамалуттиннул дакнийн ливккун бур цува ттинин яхьанай ивкисса аваданшиндарал хлакьиравусса нач-намусьсса асар.


Яла та кьатлул залуннал, личилулулу Жамалуттиннухгу урувгун, пиш хлаласса лугьатрай увкуну бур: «Я, Жамалуттин, ябити шиккун!». Мукунгуну куну, ссюрхьирайн дияннинсса цалла ка та адаминал диркуну дур лархьсса царавун. Ка махьуннай дурксса чумал, бурчу чари, канийсса царагу члара ччурччуну кьаларкьуну дур. Хайран хьуну авцунугу ивкун, Жамалуттиннул яла суал буну бур: «Му ци караматшивур ва ча, цукун килулли вин ттул цагу?» - куну.

«Вияту ттухь лахьхьува бивсуна Ярагьиял Мухаммадлул, угу-увкуна: «Вичан учлантиссар Жамалуттин, ина му, вичава гьанттагу ивтун, увцуну ухьхьу ттулчан, та жула имандалул инсани, танаяту яла махь хьунтиссар шайх ва устгаз!» - куну.

Мукун хьугу-хьуну бур яла, хьуну бур Ярагьиял Мухаммадлул увкусса куцуй. Члал кьавхьуну цусса устгазнаясса хавар ппив хьуну бур архьсса Аьрабустаннал ва Бухарнал дазурдайн бияннин. Чиявусса

Тарихрал члалив

Шайх Жамалуттиннул арс Аьвдурахиннул дакнийн бичавурттава Сайид-Хусайнхьал Жамалуттин



Шайх Жамалуттин. Худ. Хайруттин Кьурбанов

инсантал занан бивкун бур муначан илагьийсса тарикьатрал хьирив, бучан кьашайминнал чичлан бивкун бур муначан чагьарду.

Муния махь бивкун бур Жамалуттиннучан Гьази-Малла ва Шамил. Бивкун, му мийжаннугусса шайх ушиврийн ва мунал бияла хьунмашиврийн цивпа мукру хьуну махь, вичи дирхьуну дур шариаьтрал ва тарикьатрал хлакьиравусса мунал насихатирттах. Цуппурттугуну насихатчигу, мунал цанисса мюталимталгу яхьанай бивкун бур личи-личисса шархьаву, яла 50 шиннардий шамагу яхьанан ивкун ур чачу - Дарголив, Веденолив ва цайми-цаймигу кьанттурдай.

Шайх-Жамалуттиннул ца

ялу-ялул машгьур хьанакьаву хьинну тлааьн кьабизлай бивкун бур Аслан-ханнал. Ца кьини, чиявусса халкьгу бавтисса кьанттай, мунал тлалав буну бур шайхная циниягу ца карамат ккаккан даву, кьадарча, гукул халкь гьалак буккан буллалисса инсанная цал кьисас ласуна, дарвач бишунна тисса мяналий. Му чумал, лагма бавтминнангу баллай, Жамалуттиннул куну бур: «Ласира члантиригуча, нанира ттул хьирив», - куну. Гичча арх бакьасса, ца цинцлалгу бувицусса кьанттайн бивсса чумал, аьршун лахь, 1 1/2 угтаннай дусса парчагу ттуршах бивцуну, устгазнал куну бур: «Диххияра, шикку, шанна аьршундалул куртшиврий, зун лякьинтиссар ванияр ци-

Ттул буттал Жамалуттиннул ца, хьинну зат килсса алимчу ва мубарак хисаврай, машгьур хьуну дия бусурманнал дунияллийх.

мирагу ттуршукулул хьхьичива исламрал цаний бивкисса 16 шинавусса душнил нурчи. Сурувраву кай-кай бивсса чурх зун лякьинтиссар, ваца дахьва лахьхьу бивкисса кунма, сагьну, цуну, хьазамрайгу ттигу члалайна диклантиссар члантираклар диян дурсса шавугу».

куну, цал ишан дуркун, шуну ххаржан, утан. Оьвтий бивкуну, Жамалуттин лавгун ур. Амма ханнал хьамал кьамул бай кьатлулун увххун нанисса чумал, ханнал чулийнай каругу титтин дурну, лахьсса ва кьанкьасса чуний куну бур: «Вин ттуяту ттигу ци ччай дур? Итаннав на ттулашиврий паракьатну ягу кьаитаннав!» - куну. Микку цакуну гьанавихи хьусса хан, уния ккура авну, анаварну увххун лавгун ур цала тавханттувун.

Амру кьабунува буний ливчисса нукарталгу, хьумургу кьабуну, лавгун бур гичча. Яла махь, цува мукру хьусса куцуй, Аслан-ханнал бивсун бур увххун нанисса чумалсса



Талатаву дан бивчун нанисса зунттал чиварк. Худ Т. Горшельт.

Дихлай, устгазнал кусса куртшиврийн бивсса чумал, мийжаннугу, льякьуну бур душ, ганал бивсьсса куцуйсса. Муния махь кьаивтун ур ханнал устгаз цаппара хлаллайсса паракьатну. Амма му иш хьуния шиннай лапра гужну ппив хьуну дур илданий шайх-Жамалуттиннул ца. Ханнал муниву члалай диркун дур цалла ханлугьрансса нигьачлаву. Ахиргу, мунал кьаст лархуну дур устгазналхьусса бан.

Оьвчин буну Жамалуттиннуну чачанма хьамалугу, амру буну бур нукартурайн, ххаржантругу хладур дурну, Жамалуттиннул кьинттулулх баццияра

Жамалуттиннул каруннай, каруннал ацлаву кьиссурай лархьсса цурду члалан диркуну куну, Жамалуттиннул хьачунттахугу цирив ца аждагалул журалийсса зат ялугьлагьисса кунна дирзуну куну.

Му ишгу хьуну, Жамалуттин цаннийна ккура авсса чумал, сайки хьиривра дуркун дур ханнал яла ххирамур шарьсса Уму-Гулсун, ва миннатгу буну бур ханнал ялтту учу куну. Ххисшала вил чулийнай жагьаласса ша кьаласунна тисса махьгу буллунни ханнал куну, ганил ганахьхьун буллуну бур муси дусса



Ярагьивсса зиярат. Худ. Г. Гагарин.





Гъази-Гъумучиял ца махІла XIX век.

Щайх Жамалуттин-нул кІунттила дурксса чичрурда-ва ца яла язимурну хІисав хъанахъиссар, тІарикъатрал мазгъабрал мухІлу-хІин ахттар дуллалисса, «Адабуль-Марзия» тІисса трактат. Му оьрус мазрайн таржума дурну дуссар ттул уссил АьвдурахІманнул.



Чавчавадзехъал кІиниязтурал хІатталу



кІива-шанма киса (ца кислуву бикІайсса бивкІссар тІар 25 голлан ашрапи - Р.Б). Цал къаласлайгу ивкІун, гай мискинтурайх ва муридтурайх бачІиншиврул буллуни кувкун, Жамалуттин-нул къамул дурну дур мусигу.

Амма ханнайн ялагу вихшала къадихълахъисса ттул ппу ивзун ур Аслан-ханнал канилу къабивкІсса Шахъарав. Муна му щайх Жамалуттин гиккун ивзсса чІумуя шинмай Шахъарату сукку хъунугу бур яла шаллусса 25 шинал мутталий най бивкІсса гъазаватрал дяьви, августрал 25-нний 1859 шинал Гъунив Барятинский Шамил ясирну угъаннинца бакъавцІусса дяьви.

1854 шинал, ясирну бувгъуну бивкІсса кІинияз хъами Чавчавадзе, Орбелиани ва миннал агълу-авлад тархъан баврил ялувсса ихтилатру нанисса ппурттуву, хъинну агъамсса дянивчүшиву дурну диркІссар Жамалуттиннул. Микку мунал ишла бувну бивкІссар цалва мукъул бияла ва илданул дянивсса авторитет. КІулсса кушцуй, ми зана битанссаннухлу оьруснал хІукуматрал уллай бивкІун бур махъунай оьрусначІа ясирну ивкІсса Шамиллул аргсу, мунашал архІал ялагу цаппара муридталу, ялун 40.000 къуруш арцулгу. Амма кІиниязтурал кулпатру ясирну бугъан ххярххун диркІсса къюкълул (миву хІисав хъанай ивкІссар тІар 11.000 инсан, чІалачІиссаксса, ва ккал хъиннура хъунна дурну дунуккар) тІалав буллай бивкІун бур 1 млн. къурушрал, аьраьллил давла хІисаврай, ми арцу цайхра дачІиншиврул. Шамилгу микку захІматсса иширахун агъну ивкІун ур: ца чулуха мунан, гъай-гъай, зана итан ччай



Щайх Жамалуттин яхъанай ивкІсса Гъумуксса къатри


ивкІун ур аманатран уллуну ивкІсса цала арс, вавур чулухагу, цалва муридталу цалла хІалал дурсса хъулицІа бан ччайгу ивкІун акъар.

Муна микку хІала увххун ур щайх Жамалуттин, дурну дур ми кІивагу чулухаллил, яни имамнал ва халкъуннал вивсса, дя. Му иширал ялув бавтІсса маслихатрайнгу увкІун, лавхъун бур махъ шайхнал:

«Муридтал! Зу циняв гъалгъа тІий буру миллиондаляту. Зун зунна кІуллив миксса арцу дуккиннагу. ХІатта Дагъустта-

найгума лякъиншиву къакІулли миннул ккал дансса инсан. Му бакъассагу, миксса арцу ча лякъинтІиссар кІинияз Чавчавадзе? Зу зура хъямала дурну, ппив-ххив дурну дурхха мунал хъус-хъиншиву, му ур цІана ачІи кІачІану ливчІун.

Оьруснал чулуха зун 40.000 къуруш арцулгу дуллай, жула имамнал аргсу зана итлатавури в тІурча, му кІиниязнай паччахІнан хъанахъисса цІимилулли. Ми танал дуллай усса ур цала чулуха. Зури в тІурча, му икьралданий бакъин ччай ба-



Щайх Жамалуттин. Худ. Анна Самарская

1860 шинал, оьруснал хІукуматраца ихтияргу ларсун, ттул ппу ивзссар Туркнавун. Туркнал Султаннулгу му къамул увссар хъун-масса хІурматрай: муна бивхъуссар 4.000 меджидиэлул лагрулийсса (туркнал арцу) оьрмулухунсса харжгу ва ихтияргу дуллу-ссар мунахъхъун цанма ччан бивкІсса кІанттай миналул хъунсса.

къару. Ци дард-хажалат дакъа-хъунссар жула имамнал дакъиний, мунал арс чапуртураца махъунай уцин хъанахъисса мажалгу зу ккалывагу буллай бакъару. Зул цІаний акъаяв Ахулголив Шамиллул цала арс аманатран къаивтунгу ивкІсса. Лайкъссарив уздансса зунттал чувнан чапуртурал дянив аьян, ухлаган мурид къаитаву, мурахас ангу хъанай бунува! Мугу ссал цІаний!? Ххисшалану ласунтІисса ца-кІира манетІалул цІаний. Хула, хІисав дара, ци-циксса дяин най дур гъарцаннан дарчІуну махъ ми арцугу, ххюцІалуннияр ххишаласса хъанай дакъануккар. Миннувату дуккан дара цанна Шамиллун ва жун, сайидтуран, дагъаймигу. Талатавриву нава гуртту хъуну акъанугу, ттулва агълу-авладрашал архІал ттун дагъантІий дур 50.000 къурушраяр чан дакъасса арцу. Ца лахІзалийссавагу пикри къабувнува, на хІадурну ура миннуяту махъаллил хъун. Зури в тІурча, циваннир, тарснубавцІуну буру ца-кІира къурушрал ялув. Ттул пикрилий, му хъинну нач-намусъсса кІанттур, муридтал!».

Жамалуттиннул ихтилатрал гъалак бичин бувсса зунттал

вирттаврал, ца зумату кунма, куну бур миккува: «Жун цичІав къааьркини, так зана итийча махъунай имамнал арс. Жу хІадурссару жула кулпатиртан дагъаймургу къурван дурван чапуртураца имамнал арс мурахас аврил цІаний!» - куну. Жамалуттиннул аькъилсса мукъурттийнгу барчаллагъ куну, яла циняв ппив хъуну бивкІссар шаппа-шаппайн.

Мунийн бувну баххана бавугу яла хъуссар оьруснал маслихат дурну диркІсса шартІирдай. Чавчавадзе ва Орбелиани кулпатру, къараваштал ва зузалтгу хІисавну, на аьйкълай акъахъурча, цинявагу 30 инсан, мурахас бувссар ясиршивруца, миннахлу зана хъуссар Шамиллул аргсу, ца ттуршаксса ясирну агъну ивкІсса зунттал чувгу, 40.000 къурушгу хъиривну.

Ча, халкъуннал цІаний хъхъичІва Шамиллул цала къурван увну ивкІсса арс, утти гайннала хІарачатрайхчин зана ивтссар махъунай. Яраппий, щукрурхха цайна Аллагнайн!

1860 шинал, оьруснал хІукуматраца ихтияргу ларсун, ттул ппу ивзссар Туркнавун. Туркнал султаннулгу му къамул увссар хъунмасса хІурматрай: муна бивхъуссар 4.000 меджидиэлул лагрулийсса (туркнал арцу) оьрмулухунсса харжгу ва ихтияргу дуллу-ссар мунахъхъун цанма ччан бивкІсса кІанттай миналул хъунсса. Ппу миналул хъуссар ИстІамлив. Тиккува лавгссар ахиратрахъхъунгу, махъ къаивтун ряха аргсу: шама - Туркнавусса къулулгърай, шамассагу - Аьрасатнаву, оьруснал кавалериялул къюкълува.

Щайх Жамалуттиннул кІунттила дурксса чичрурдава ца яла язимурну хІисав хъанахъиссар, тІарикъатрал мазгъабрал мухІлу-хІин ахттар дуллалисса, «Адабуль-Марзия» тІисса трактат. Му оьрус мазрайн таржума дурну дуссар ттул уссил АьвдурахІманнул.

ХІадур бувссар
Руслан БАШАЕВЛУЛ



ИТНИ, 24 АПРЕЛЬ
05.00 «Доброе утро». (12+).
09.20 «АнтиФейк». (16+).
09.25 «Жить здорово!». (16+).

ТТЛАТ, 25 АПРЕЛЬ
05.00 «Доброе утро». (12+).
09.20 «АнтиФейк». (16+).
09.25 «Жить здорово!». (16+).

АРВАХИ, 26 АПРЕЛЬ
05.00 «Доброе утро». (12+).
09.20 «АнтиФейк». (16+).
09.25 «Жить здорово!». (16+).

ХАМИС, 27 АПРЕЛЬ
05.00 «Доброе утро». (12+).
09.20 «АнтиФейк». (16+).
09.25 «Жить здорово!». (16+).

НЮЖМАР, 28 АПРЕЛЬ
05.00 «Доброе утро». (12+).
09.20 «АнтиФейк». (16+).
09.25 «Жить здорово!». (16+).

ХХУЛЛУН, 29 АПРЕЛЬ
06.00 «Доброе утро». Суббота.
09.00 «Умницы и умники». (12+).

АЛХИАТ, 30 АПРЕЛЬ
06.00 «Доброе утро».
06.10 «Полкаст.Лаб». (16+).

РОССИЯ 1

ИТНИ, 24 АПРЕЛЬ
05.00 «Утро России».
07.35-07.41 Вести-Дагестан
08.07-08.10 Вести-Дагестан

ТТЛАТ, 25 АПРЕЛЬ
05.00 «Утро России».
07.35-07.41 Вести-Дагестан
08.07-08.10 Вести-Дагестан

АРВАХИ, 26 АПРЕЛЬ
05.00 «Утро России».
07.35-07.41 Вести-Дагестан
08.07-08.10 Вести-Дагестан

ХАМИС, 27 АПРЕЛЬ
05.00 «Утро России».
07.35-07.41 Вести-Дагестан
08.07-08.10 Вести-Дагестан

НЮЖМАР, 28 АПРЕЛЬ
05.00 «Утро России».
07.35-07.41 Вести-Дагестан
08.07-08.10 Вести-Дагестан

ХХУЛЛУН, 29 АПРЕЛЬ
05.00 «Утро России». Суббота.
08.00 ВЕСТИ.
08.20 СУББОТА.

АЛХИАТ, 30 АПРЕЛЬ
06.15 Ирина Таранник, Михаил Химичев, Нина Гогаева и Александр Никитин в фильме «Личные счёты».



ИТНИ, 24 АПРЕЛЬ
07.00 Время новостей Дагестана. Итоги
08.00 Мультифильм 0+
08.20 Х/ф «Ульянка Бога, или Чисто одесская история»

ТТЛАТ, 25 АПРЕЛЬ
07.00 Время новостей Дагестана
07.20 Передача на табасаранском языке «Мил» 12+

АРВАХИ, 26 АПРЕЛЬ
07.00 Время новостей Дагестана
07.20 Передача на табасаранском языке «Мил» 12+

ХАМИС, 27 АПРЕЛЬ
08.55 Т/с «Чужая кровь» 11 с. 16+
09.50 «Городская среда» 12+

НЮЖМАР, 28 АПРЕЛЬ
07.00 Время новостей Дагестана
07.20 Передача на аварском языке «Гаданги памалити заманти»

ХХУЛЛУН, 29 АПРЕЛЬ
07.00 Время новостей Дагестана
07.20 Передача на нугойском языке «Халк ва заман» 12+

АЛХИАТ, 30 АПРЕЛЬ
07.00 Время новостей Дагестана
07.20 Передача на лезгинском языке «Халк ва заман» 12+



ИТНИ, 24 АПРЕЛЬ
04.40 Т/с «Пляж». (16+).
06.30 «Утро. Самое лучшее».
08.00 «Сегодня».

ТТЛАТ, 25 АПРЕЛЬ
04.35 Т/с «Пляж». (16+).
06.30 «Утро. Самое лучшее».
08.00 «Сегодня».

АРВАХИ, 26 АПРЕЛЬ
04.35 Т/с «Пляж». (16+).
06.30 «Утро. Самое лучшее».
08.00 «Сегодня».

ХАМИС, 27 АПРЕЛЬ
04.45 Т/с «Пляж». (16+).
06.30 «Утро. Самое лучшее».
08.00 «Сегодня».

НЮЖМАР, 28 АПРЕЛЬ
04.50 Т/с «Пляж». (16+).
06.30 «Утро. Самое лучшее».
08.00 «Сегодня».

ХХУЛЛУН, 29 АПРЕЛЬ
05.15 «Военно-исторический марафон». (16+).

АЛХИАТ, 30 АПРЕЛЬ
04.55 Т/с «Пляж». (16+).
06.35 «Центральное телевидение».

«Илчилул» календарь Ва нюзмардий бувссар

Апрель зурул 10-ний 1956 шинал увссар Новостройрал Пенсиялул фондрал директор **Назим Шайхаев**.

Апрель зурул 18-ний 1944 шинал бувссар балайчи, Дагъусттаннал халкъуннал артистка **Лайла Мажидова**.

Апрель зурул 19-ний 1977 шинал увссар ДР-лул экономикалул ва территориал лябуккулул министр **Хижи Султанов**.

Апрель зурул 19-ний 1936 шинал увссар Дагъусттаннал Педагогикалул институтрал профессор **Сулайман Абакаров**.

Апрель зурул 22-ний 1958 шинал увссар ДР-лул ви-валлил иширттал министр, генерал-лейтенант **Авдурашид Махаммадов**.

Апрель зурул 23-ний 1953 шинал увссар АФ-лул Хиурмат лавайсса энергетик **Авдулхалик Халиков**.

Барча бавуртту



Апрель зурул 23-ний Илияслул душ Рамазанова Зулайхатлун хъанакъи-ссар 70 шин.

Зулайхат бувссар 1953-ку шинал Цуссалакрал район-далий Цуссалакрал шяраву. Цила оьрмулул дус, Хижидавулдул арс Юсуплулцал ванил хъуни бувссар ххаллилсса ххюва оьрчи. Аьрасатнал Федера-

циялул лагрулийсса «День семьи, любви и верности» тИсса байрандалуцун бавхуну, хАлалгу дурссар Хиурматрал грамота. Муний чивчунугу буссар укунсса махъру: «Награждается семья Рамазановых Юсуп и Зулайхат за долголетнюю совместную жизнь в мире, любви и согласии, и как родителей, родивших и воспитавших пятерых детей».

Хиакъинусса къини Зулайхат яхъанай буссар Гъумук. Лакрал райондалул почталий зий ванил дурссар къура шин. Хиурматрай ва къиматрайгу буссар цила даврил уртакъу-рал, Гъумучиял жяматрал ва кУлцириннал дянив.

Жул ххирасса, ххаллил-сса Зулайхат! Вил хъунна-сса юбилейгу барча дулла-й, чи тий буру вин чIарусса цуллулсса шинну, цIу-цIусса ххари-хъиншивуртту! Яхъанакъу вилацириннашал тирхандарай, талихIрай, ина му хАлал бувссар!

Цинявпагу ина ххирами

Лакрал райондалия

ДакIний личIансса мутта

«Движение первых» тИсса Шалагу Аьрасатнал жяматрал оьрчиру ватан ххирану тарбия баврил ххуллий дуллалисса мероприя-тиярттал лагрулий апрель зурул 12-ний, Космонавтикалул къини, Гъумук хъунни «Мы – граждане России!» тИсса акция. Цувгу хас дурну дия оьрмулул 14 шин бартларгсса аьрасатлувтуран па-спортру булаврин.



Райондалул бакIчинал канища паспортру лавъсса Жамал Юсупов (ГъунчIуькьатIрал школа), Автондил Хизиев (Хъурхърал школа), Назира Кичаева (Щардал школа), Зураб Чавтараев ва Рабият Шахшаева (Гъумучиял школа).

Зулайхат ТАХАКЪАЕВА

Мероприятие хъунни шад-лугърал лагрулий райондалул маьгирлугърал къатлуву, Совет Союзрал Виричу, летчик-космонавт Муса Маннаровлун хас дурсса выставка тIиртIусса залдануву. Паспортру акция-

лул лагрулий буллан ккаккан буну бур оьрчиан ва цала оьр-мулуву агъамсса лахIза дакIний личIансса, цува Аьрасатнал ин-сан ушиврия пахру багъансса мурадрай.

Акция сакин дурну дур рай-ондалул администрациялул Жа-гьилтурал политикалул, спор-

трал ва туризмалул отделданул. Шикку гьуртту хъунни рай-ондалул каялувчитал, админи-страциялул ва маьгирлугърал идаралул зузалт, паспортру лас-ласисса оьрчал нину-пу.

Акция дайдируна Аьрасат-нал ттугъ лавсун бучIаврийну.

Райондалул бакIчи Юсуп Махаммадовлул увкунни:

– Жунма хъуссар авадансса тарих ва надирсса ирс бусса, чIавусса миллатру ва культурад-ду цачIун хъусса билаятрай яла-пар хъанансса бахтти. Хиакъину паспортру ласлай, зу хъанакъи-ссару бюхттулсса билаятрал ин-сантал. Ххирасса оьрчирув! Зул хъьичI буссар лахъисса оьрму-лул ххуллу. Умуд бур жу зухъ-ва дакIнийхуну тIутIисса ххул-лукъиндарал мукъурттилгу асар биян банссар тИсса зу тIайласса ххуллийн буккан. Зува чув бу-хъурчагу, къадарданул чунмай бичирчагу, лайкъну дуруччара аьрасатлувнал ца. Буруччияра зула бакIрал чагъар! Букканнав зуя жула билаятралгу, районда-лулгу лайкъсса инсантал!

Хъинсса аьдатну хъуну дур паспорт ласласийни хъа бувай-сса. Цинявпагу паспорт лас-ласиминнал цIанияту мукунсса хъа бунуни Гъумучиял школа-лул дуклаки душ Рабият Шах-шаевал, Муния махъ районда-лул бакIчинал кIунттища цала яла агъаммур документ лав-сунни дуккавриву ва спортра-ву хъьичIунсса ххюя дуклаки оьрчал.

Акция къуртал хъунни рай-ондалул маьгирлугърал къат-лул зузалтрал концерт ккаккан даврийну.

Ккуллал райондалия

ЦIусса хияллащал цIусса ххуллийн

Ккуллал райондалий 14 шин хъусса дуклаки оьрчиайх бавчIунни Кпаспортру. Муницун бавхIуну Ваччиял шяраву хъунни хъун дакъасса шадлугъ. Дуклаки оьрчиан тIайлабацIу чи учин бавчIун бия райондалул администрациялул зузалт, школалул коллектив, мачча-гъанми ва дуклаки оьрчиру. Паспортру ласласисса дуклаки оьрчиру барча бан Аьрасатнал гимнрахану гъаз бунни ятIул ттугъ, оьрчиалу, цайнна дуллалисса вихшалагу, тIалавшиннагу тасттикъ дулла-й, Аьра-сатнал билаятрай хIакъшиврийнуса хъа бунни.



Ххарисса асардашал ва цIусса хияллащал дукла-ки оьрчиру бувкунни цIусса ххуллийн. Паспортрал агъам-шиврия ва тIалавшиндарая ду-клаки оьрчиахъ бувсунни учи-тель Марзият Макъсудовал. НасихIатрайсса махъру лавхъу-ни хъамаллурал, личIи-личIисса идарарттал зузалтрал ва нитти-буттал.

Райондалул администрациялул чулуха оьрчиру барча бунни адми-нистрациялул бакIчинал хъирив-чу Анатолий Давдиевлул. Ванал бувсунни паспортрацIун бавчIусса кодексрая, законная ва дуклаки оьрчал ванияр тихуннайсса ихти-ярдая ва тIалавшиннардая.

ДакIнийн бутан, АФ ГК-лийн буну, 14 шиннавусса оьрчиахъ дуссар авторнал пра-

во ишла дуллансса ихтияр, про-извенияртту чичлансса, сура-тру дихълансса, ци-дунугу ля-хъан дуллансса ва ссаха-бунугу цала измулий зунсса ихтияр, банкрай харжлугъ ишла дан бучIишиврийнуса ихтияр, му-кунна дарсирдая махъ ягу кани-куллай даврий зунсса ихтияр.

ХIадур бувссар
Аминат АХИМАДОВАЛ

Ккуллал райондалия

Дуклаки оьрчиансса къулайшинна

МахIачкъалалал хъун шмайданнив хъунни шко-лартган итабавкъусса автобу-сирттал кIулли директорту-райн тапшур дуллалисса меро-приятие. Шадлугърал тагъар-даий Дагъусттаннал премьер-министр Авдулмуслим Авдул-муслимовлул дарчIунни «Га-зель» автобусирттал кIулли. Миннавух бур Ккуллал район-далийсса СунбатIуллал шяра-валлил школагу.




лил школалул дуклаки оьрчиаща биъанма хъунтIиссар дарсир-дайн занан.

Утти СунбатIуллал шяравал-

Объявление

Утерянный диплом № ЕВ – 222159, выданный в 1983 году Дагестанским государственным университетом на имя Сулейманова Камала Исмаиловича, считать недействительным.



Адабиятфал
лажин

ПАТИМАТ РАМАЗАНОВА

Цусса шеъррдава

Муниятү буравав дакI
зунттая дукъацлай

На бувссара, бувссара
дяинтту кIюрххицунмай,
Мурчан ябивху кьатрайн
чаннал туранну шайни,
Муниятү буравав
дакI тархьанну ляхъусса,
ЧанначIан кIункIу тIийнма оьрму
гьан буган ччисса.

Яхъуссара, хъуссара
Мурзу-Ххуллул ланттурдай,
Ялавайгу, лавайгу нанинал ссалам ласлай.
Муниятү буравав уттигу вай шагьрурдай,
ЦувкIул бунийн бачара
ххаришиврул хьаттирдай.

Хъун хъуссара, хъуссара
Аьсар-Ххяллул зункIуллай,
Ссавний цIуртгачIан гьансса
бюхттул цияллайх занай,
Муниятү буравав
дакI зунттая дукъацлай,
Ниттил карав оьрчI кунма,
ЦувкIрав кIункIу тIийнмасса?

Яттикьушлий ккаччи ххявххуни кунма,
Дяхъхуниву макIлил шцах учин бунна:
«Ча бувкра!» учинсса чув къаливчIусса
ЦувкIрав нава хьунна цан-чаннавух най.

Щарашуйн най бияв шамарал хьачIрайх,
Ца кацIлул хIапвагу баян хьурдай тIий,
Ча-чунгу, ча-чунгу ЦувкIуллал ардайх
БюрукьатIри бия ханну хьюлчай тIий.

Я Аллагь, мабара ттун танмихI обсса,
МакIравагу ккаккан мабара ЦувкIул
«Ча бувкра!» учинсса чув къаливчIусса,
Мурчал чIуний шйитIант шцотIа тIутIисса!

Арбухарал ссавния
Багьну нанисса цIуку
Сунаарнил витIанхьрай
Ливккунни тамашану.



Владимир Васильевлуцал

Бава бюхттул цияллай
Щаннашал хавардай дур,
Машилийн лавгсса бутта
Шавай чIал хьанай ур тIий.

Чаххулгу шанай бакьар,
ЧаркIув чани бунуккар,
Лагь цIарайсса кIункIурдул
ЧIу бакьар, чIу-читI бакьар.

Буттал балчан хьулухун
Бивсса чIу бавунниха,
Албухарал ссавния
ЦIуку ликкай къапулий.

Жагьилссагу бакьара, хьунмав хьунгу бугара



ХьюцIаллий ххюра?! Вагь! Дакъахьунсар ттунна миксса. Ттух дагьантту-
хва бурулагисса та душнин духьунсар. Ттуйн лажинну бавацIусса, лажингу
ттул дусса. Тахьаарих илкинну итабавкъусса балчаннул ракъудалий ва мурчаар
дирисса бушилий лерххун лагайсса дур шинну. Зувиллий шанна шин хьуну дур
ттул «Илчилий». Гьарца шаттирахан тIисакссагу, тикрал бара, нава «Илчи-
лийн» тIайлану тIайла бавацIуссара куну. ТтуцIун «Илчигу», нагу «ИлчилуцIун»
бавкъуссару куну. Хьунмахъ къахьун, миллатрал мазрай чичлай, миллатрайн
багьлагьисса масьалартту аьч буллай, гьаз буллай къулдугь буллалаврияр
хьхьичIунсса ва язисса иш цамур бикIан къабюхьайну тIий. ТтуцIунма бавкъу-
ми чIавусса бикIаншиврийнсса тамахIу бур, кказит бучIан баймигу, буккаймигу
лакку мазрал ва лакку улкIул бучIантIимуний дакI цIуцIаву думи буну тIий.
Къапашманна ца хьисвагу, явара. Ххуйсса чIун дур утти ттул.
Аькьлу лахьхьин бугасса, жагьилссагу бакьара, хьунмав хьунгу бугассара.



Аьрайн нанийни
арснал

Аьрайн нанийни, арснал
Икьрал дурсия ттушал,
Гьар кIюрххил ххяхабургьил
ТIинтту ларзулун шайхту,
Ларзнил чIавахьулттичIан

Гьан хьуну, ка дишаван
ЧIавахьулттайсса тIинттай
Цара-ца чIумал – мудан.

КIюрх хьа чиннин ялугьлай
БикIара тти хьачавай,
ЧIавахьулттил та чулух
Арс авцIуну усса ххай.
ТIинттайх ках тIий,
Ппайрду тIий,

55
ШИН

Пюрундалийн багьара
ТIинттавах арснал симан
ЧIаврайн лаяйссания...

На чIавахьулттийн багьлай,
Арс – Украиннал чуллай,
Ва чулух на яхI буллай,
Тамур чулух арс талай...
ЧIавахьулттил чIирацIсса
ШанчIапIаву някI тIутIив,
Я Аллагь, арснал чIуний
Щуршувагу бугара...

Ссавнил ва зунттал дазу
дуван къашай шяраву,
Щюлли интнил ардайсса
тIуркIурдавун гьан ччива.
Интернетту дакъасса,
смартфон цирив къакIулсса,
ОьрчIшиврул кIичIирттавах
бавал хьирив най ччива.

ЧаххувоьрчIал кьюкьлуцал
гьан ччивахха цалагу,
Табиаьтрал хIикматру
ххал дуван Тахьаарив:
Бургьия ламус буллай,
бакIру къус ритлатисса
Дараччи-тIутIал иттав
буроган шайрив ккаккан.

УчIайривав кIихьрагу ттул яру някIсса
уссу
Лахькьурату жипру
къурнил нушул дурцIуну,
МахIлагу лагма лавгун,
ца ланжарттува канан,
ЧIарах нанинайх бачIлай,
ланжари дачIра дуллан.

Дуккайривавли ттигу
гила шиннай Жавлисан,
Инил къясругу буну,
гьарнайн оьвтIий аьнттучIан,
Инил къяслишал архIал
жул витIанхьерттай дихьлай
Пачкъатлул хIахIлийн шусса
гьилисса тIинттал кIалай.

Зунттурдал бурхIай
ливксса цIузуруйну
лажинну

КIидяризал гьархьхуну,
кIяла-парсса ларзулу,
КIидархIуну, къуж дурну,
дур бава баркъутраву.
Зунттурдал бурхIай ливксса
цIузуруйну лажинну,
Заэв дурксса ттул бава
дуаьрдай дур цIунилгу.

Шиннардил лахIан дурсса
бавал дакIнил куртIнива
Экьи най дур дуаьрду
кIижурасса цIаннавун,
Къия ялтту дуклайсса
якъамасса чIунива
На микIлачIун буллайсса
леххаврил тIитIурдавун.

КIюласса тIинттайн дурксса
бавал илтIасса кару,
Хханссар хIатти бухлавгсса
хьхьинякI лелуххул хьару,
Ларзукьатта – някI чаннахь,
някI ссавмур – чаннацIурттахь,
Бавал тIувтIу багь кару –
цIаннал ва чаннал тIинттахь.

ЛахI-ккухI тIий яхI буллайсса
бавал мурччал щурщурдай,
Ахир дакъасса бавссар ттун
миннатрал дуаьрду.





Энрик Муслимовлуцал



Адабиятрал
лажин

Дунияллул ххуйшиву
– рувханийсса ххуйшивур,
Шукру бусса дакИниву
рувханийсса тавхана,
Я, ттул ххирасса Аллагъ,
исламрахсса ччаврилли
Дуниялгу, оьрмугу
бургил рангиран шайсса.

Лажиннича, бавай, чIарав щядикIу

Лажиннича, бавай, чIарав щядикIу,
Букъа карунниша чIатлу, лахбичу,
Цалагу вихлурари рити чIаракIу
ЧIатлу буккан, кIачIа дуван цIияллу.



Кьуннилай кIюрххилнин
бавал, Заннайн ладизлай,
Утгара дурссар, валлагъ,
савний цIуртгиксса хьхурду!

Цаннал тIакъагу дуркьун,
КIюрхнил кьабакI аьч дувай,
Ватандалул кьанкь дусса
Инт дур кьатIув итххялай.

Лакку мазрай чирчусса
Назму ур уссу ккалай,
Интнивун зума шусса
Кьини дур ттуйх ках тIун ччай.

Дунияллул ххуйшиву — рувханийсса ххуйшивур

Дунияллул ххуйшиву –
рувханийсса ххуйшивур,
Шукру ва ххуллийн нава
тIайла бувсса Аллагнайн.
Лирицусса ссав кунмасса
диндалул ссурвалгу бур,
Чани-парсса дакIурдил
чирахьру лахъан кIулсса.

Шукру дардгу дуллусса,
оьрмулун мягна кIучин,
Цаннал хьиривсса чаннал
тIилисин яргну чIалан.
Шукру цаннава бувксса,
оьрмулун кьимат бувчин,
Цуртгал нур дусса ислам
дакIнил куртIний цIакъ дуван.

Щавулий ка дирхьуну,
шукру буван лавхьхунни.
Щавулий ка дишайма, я ттул Аллагъ Тааьла,
Я цаннаву, я дякьий навалу кьабитайма,
Язисса чаннал тIинтгах
дакIру тирх учин дайма.



Арснацал

Кьаккакара ина, каш-куш тIий дакъа,
ЛахI-ккухI тIун лавхьусса лелуххи кунна,
Мажал бакъуй, бавай, вил лахьи гьухъа
Ца ттуршийлва цIивгу, хьовугу ххал шай.

Дяхьхуниву нагъ-нис дуллан дачара,
Цан-чаннаву чIаркIув, ппалав дачара,
Жул чIарав щядикIан чIуннагу дакъа,
ЗахIматрал зерххунна оьрчIинияцIара.

Лажиннича, бавай, чIарав щядикIу,
Чаннал тIиму хьуну, ттул итгав дургу,
Савний ттуруллая вилва хатI бувну,
Ссалам гьан бува ттуйн,
ссинкь кьабаччинну.

Ссавнил кIутIу бувунни
Ттурулал халичартту,
ОьрчIкьакъунтту ливхьунни
Ххарархху хьхьутул хьувун.

ХIаллицих гьаралуннил
БайбишинтIиссар кьиссу,
ТIугазаннив тIутIалгу
КьарчI ритантIиссар хьачIру.

Интнил марцI-щюлли хьхьемай
ХьачIунттивугу шюршуну,
Барзунтгал гьаз дантIиссар,
Буттахьал кунна, бакIру.

Юбилейран хасну Щюлли душ, шаэр, «Илчилул» пахру



Кказит тIитIайхту, редакциялийн
зунсса гьирарай бувкIиннавухсса
ца бия ПатIимат Рамазанову. Тани ва
ДГУ-лул студент душ бия. Амма Казбек
Мазаевлу, «ЧIавалачин» оьрчIансса
журналданул редакторнан, ПатIимат
танияцIакулва кIулу лавкьуна. Цанчир-
ча журналданийн ванил макьалартту,
назмурду дучIайсса диркIун тIий. Казбе-
кIун хIаз бивзун бия школ душнил ция-
ва «нагу зучIан чичлачисса щюлли душ
бура» учаву.

Бюхьуллул даража ххал бан ялув бив-
хьусса бурж ПатIиматлул хьинну дакI да-
кьинну биттур бувна. Цаппара хIаллава,
университетраву дуклайгу бунува, жу
кьамул бувссия ПатIимат штатравун.
ПатIимат най бунува чIалай бия ялун
личинсса гьунарданул заллу бушиву.
Чивину бунува оьрмулхьсса циллалусса
буругаву дусса бушиву, асардал авадансса
дакIнил заллу бушиву. ЧIалай бия ялагу
лакку билаят, лакрал тIабиаьт кIулсса,
ххирасса хIакьсса лакку душ бушиву. Ни-
ттил маз ххирасса, ганил нахIу-нацIушиву
асар хьусса, мазрал каш-кьудратрая ха-
вар бусса, лакрал литература, поэзия
кIулсса, му кIулшиву цила макьалартта-
ву ишла дан устарсса бушиву.

Кказитрал даву личи-личисса ди-
кIайссар. ДикIайссар материал хьин-
ну хьирив лавну, анализ дурну, цала-
мургу, цаманалмургу пикри «шахъан
бувну» дузал дан аьркинсса. Мукун-
ми журналистгьтал мундану нажагьссар
гьарцагу кказитрай. «Илчилий» чан ба-
кьая мукунсса журналистгьтал. Мин-
нава ца яргмур ПатIиматгу бия. Редак-
тор хIисаврай, ялтту буклакисса чIумал,
ПатIимат Рамазановал текст на нара ду-
ккин ласайссия, цанчирча ттун кIула ги-
кку ттула дакIинисса тирхханну льякьин-
шиву. Ттунна хIисав кьархьусса мягна-
хIисав ганил аьч дурну дикIантIиву.
Нава ганил гьунарданул ххари баншиву.
Даки дарцIуну бикIайссияв, га тирххан-
ну гьарцагу кказит бувккунал дакIинийн
дучIантIивирий.

МахIатталшиву дакъар яла ПатIимат
ххуйсса, бюххансса шеьрирдал зал-
лу бушивирийгу. Асардал кьаявха тIи-
сса дакIиниву шеьрирду кьаяхьлай
бикIайсарив. Ччай-ччяни зумух лас-
сай ПатIиматлул цила дакIиния кьала-
гайсса учитель, лакрал цIанихьсса шаэр
МахIаммад-Загьид Аминовлул цIагу. Га-
нал дарсирдаягу, ганая лавхьхьумуни-

ягу мундан бусраврайна гьалгьа тIун
бикIай.

ПатIиматлул гьунар бия кказит-
рал даву, ганил коллектив цила оьтту-
турчIайнуса кулпатран ккалли баву.
Кказитрал чIавусса дустал, аьркин багь-
ни чIарах бацIанми, ка кIидахIинми
ПатIиматлул хIарачатрайнугу хьуссар.

Гьарцаннагу оьрмуллул ххуллу кулпа-
трава байбишай. ПатIиматлул нину-ппу,
жула чIавуминнал кунмасса, шьраваллил
агьлу, хIакьсса захIматчитал бия. Амма,
шак бакьар, ПатIиматлул дакIнил хаз-
на, оьрмулхьсса ябитаву, инсантурацал-
сса жура-журардайсса арарду, алвагьсса
нитти-буттая, уссур-сунная лархьхьусса
душивирийн. ЧIяву махъ бакьасса, увку-
мур калима кIусса, бигьа бакьасса оьр-
муллул сасан дурсса дия ванил нинугу.
Цила кулпатрацал архIал ПатIиматлул
цила буттал шьравалугу, шьраваллил
зункIулливугу, ар-майданнугу, ратIру-
ккутIругу ххирар. Мигу гьурттуну дур ва-
нил чивчумуниву. Махъ бакьа, шьравал-
лил жяматгу, чIивитIуя, кьари-кьужлуйн
бияннин, ванил дакIнивацца яла гьилими,
ттюнгьами асардал чанна лахъан бувсса
мукьурттин хас хьуну бур.

Шаэр, журналист увкуну, ПатIимат
дакI кIюласса ттюнгьа душгу бакьа-
ссар, явара. Аьркин багьни, кIукIулсса
такьвалий, хьинну кьанкьасса ихтилатгу
байссар. Цила цIаний бакьача, коллек-
тивраву, лагма-чIарах багьсса иширтгал
хIакьираву.

ПатIимат Рамазановал гьунар яла ар-
гьиравумур чIун дур. Ялун личинми гьу-
нардугу ттигу чансса бакьассар. Так чан
кьабаннав лакраву ПатIиматлулгу, лакку
мазралгу, лакку литературалулгу, журна-
листикалулгу ххуллий зузминнал чIарав
бацIанми. Муния неьмат ласун шайми.

ПатIимат Рамазанован тIурча, хIа-
кьину, махъ бакьа, «Илчи» кказитрал
пахруну хьанахьисса, чIа тIий бура ва-
ния тихунмайгу тIайлабацIу. ЧIяву хьун-
нав ина чивчумуних мякьсса, муния неь-
мат ласун шайсса, мунил кьадру кIулсса
лакрал агьали.

Ва ялагу, ПатIимат, ххирай, ттула
итталу хьунма хьусса душ, цIакьсса пи-
шалул усттар, барча тIий бура вил юби-
лей! ЧIа тIий бура вингу, вил аьзизсса
арсангу цIулул-цIакьшиву, талихI-
тирххандарай гьан бансса, щалиххан-
нинсса оьрмугу.

Качар ХIУСАЙНАЕВА

Юбилейран хасну

Бусайсса мукъувугу, иширттавугу оьвхъусса чув

Ттула нину-ппу ттуява рязину дуняллия лагаврия ххишала акъа ххарину икIара

- Абдулхаликъ Аьлиевич, буси виятува, вила нитти-буттая, захIматрал ххуллия.

– На увну ура Буттал кIанттул цIанийсса Хъунмасса дъявилул участник, Ххутрал шяравасса муххал усттар Аьлил ва колхозрал зузала Аьйшабавал кулпатраву. Дъяви къуртал хъуну махъ, шаргу дурцуну, ттул хъунмур ссу байхту, ппу кулпатрашал Новороссийскалийн ивзун ур. Новороссийскалийн жул ппу, муххал усттарну зий, цала маэшат булла ивкIун ур. Дурккусса акъанугу, за бувчIусса, чантI увкусса ивкIун ур. Шар дуцайни, душ була учин нанийни, тямадашиву дан аьркиний ванайн оьвчайва. Къалмакъаллу, бувчIу-къабувчIурду хъуминнал дъянивгу маслихIат бувну, дакъил байва. Хъинну агьлугу ххирасса, агьлданунгу ххирасса ия. Тийх ялапар хъанахъисса чIумалгу, маччагъанначIан кIункIу тIий, зана хъунччай ивкIун ия. 1953 шинал, кулпатту бувцуну, увкIун ур Хасаврайн. Ниттича аьркин бансса шагьигу къабивтун, ва кIанттай жунма ца къатта ххал бува куну, цувама махъунай лавгун ур.

Нину дикIайва буслай, на лаякъатрай къауваншиврул, цинма цуксса захIматнугу, шагьрулувух луглай занай, машин ласунсса къатри ляркъуссия тIий.

Ттул ниттил ппу Исягу Дагъусттаннайх цIа ларгсса дувсилул усттар ивкIун ур. Мунал чагурттурая чIявусса ххаллисса усттаргал хъуссар. ХIакъинугу яхъуну дур мунал каруннал дуресса давуртту. ТтучIа ттучIавагу буссар аьпалун ябулаллисса мунал бувсса варакъи, гунгуми ва цаймигу къай-къуй.

Ниттия бусанмур чIявусса буссар.

Ца ппурттуву буттачIан Новороссийскалийн нанисса нину, ца канихъ чIивисса душ, гамур канихъ дука-хIачIанмур, янна-ус дирхъусса тIаннул чемадангу бувгуну, вокзалданий шядиркIун, поездрах ялугълай диркIун дур.

ДР-лул лайкъ хъусса энергетик, Аьрасатнал хIурмат лавайсса энергетик Абдулхаликъ Халикъов чIявучин кIулссар. Ва ур ларкIал миллатрал дъянив махъ нанисса, сий дусса, оьрмулугу, захIматралгу ххуллу лайкъну бивтесса чув-адамина. Вай гъантрай Абдулхаликъ кIицI лаглай ур оьрмулуд юбилей. Личи-личисса жаваблувсса къулдугьирттай зий, чIярусса лайкъшивуртту дуресса, миллатрайн багъайсса агъамсса иширттаву чялишну гьуртту шайсса Абдулхаликъуя бусансагу, учинсагу чIявусса ляркъинсар.

Ва базилахъусса «Илчилул» хъамаличугу ва ур.



Абдулхаликъ Халикъов



Ппугу, нинугу



Ниттихъ дакIнийсса буслай

Микку, ца янил ляпI учиннин, бавцуну бур мунил чемадан. Му зат, оьрмулукун хъамабитан къахъанай, буслайнна дикIайва.

Цаппара шиннардий Новороссийскалийгу бивкIун, жул кулпат Хасаврайн зана хъуну бур. Ххуйсса чIунну дикIайва. Ца кварталданийсса инсантал, ца кулпат кунма, бавкъуну ялапар хъанан бикIайссияв. Бутта шийхгу цала касмулий зун икIайва. Мудан канихъ аьппаси-шагьи бикIайва. Жу ялапар хъанахъисса кварталданий холодийлик хъьичIава-хъьичIа жуннийя бусса, телевизор тIурча, ва дарсру лахъхъин битай зат дакъар тIий, чIивима уссил ацIа класс къуртал бувну махъ бакъа къалавсуна. Бутта кIулсса чIявусса инсантал бикIай на гьарца чулуха буттаха лавхъусса ур тIий. Ниттигу учайва: «Вил ппу сагьну личIайссияв, муксса лярхъусса рухI дуняллийн дуркукун», – куну.

Оьрмулугу рязишиву сса дур учирчан, ттуятува рязину дуняллия лавгсса нитти-буттая дур, куну учивив.

Жул кулпатраву кIия арс, кIива душ буссия. Новороссийскалий буссар ПатIимат тIимур ссу. Ва бур ДР-лул Цуллушиву дуруччаврил хIурматлувсса зузала. ХхюцIаллахъул шиннардий зий буссар ПатIимат МахIачкъалалал роддомрай. ЧIивима уссу жагъилсса оьрмулугу, мюрщисса оьрчIругу махъ ливчIун, аьпалухъхъун лавгунни. «Командировкалия» ппуучIаннин

ялугълагъисса оьрчIаюгу арамтал хъунни. Ми оьрчIал чIаравгу ттушава шайкун авцIура.

- Цукун дакIнийн багъуна вин жамирду байсса институтравун уххан? Буси инава дуклай ивкIсса шиннардия, зий ивкIсса давурттая.

– Школа къуртал бувну махъ, ца ттула гьалмахъунашал, пикри бувссия Ленинградуллал жамирду байсса институтравун уххан. Жамирду, хъьири, моряктал ххуй бизлай багъуна ттувун, 17 шинавусса жагъилнавун, му гьавас. Ттула пикри буттахъ бусайхту, дъяван ивкIунни, вил хъирив Ленинградрайн занан къашайча, шиккува ххал бува винма институт тIий. Му ппурттуву жуннийн увкIуна хъунмур ссил лас, «Швейбытрал» директорну зузисса. Ганал бувсунни му институтрал филиал Каспийскалий бушиву ва маслихIат бунни мивун уххан. Ттушал дуклай буссия жула шяравасса ХIасан Айгунов, Гьумучатусса МахIаммад Мусалаев, Юсуп Хаппалаевлул арс Аслан.

Шамилчинмур курсирай дуклакисса чIумал ХIасан айивхъунни, ачу, вай махругу къариртун, Краснодардайн лавгун, Шяраваллил хозяйствалул институтрал виладельческий факультет къуртал бувну, ххуйсса пиша ласунуча тIий. Ттула буттал хасият кIулну, на рязи къавхъуссияв.

Дуклакисса шиннардий буттал ттуна нава ласлассисса стипендия-



Юбилейран хасну

Бусайсса мукъувугу, иширттавугу ОВХЪУССА ЧУВ



Шама арс - шанма мурад



лул ялун зуруй 45 кьуруш дулай-ва. Ца ппуртгугу, хавар бакъулий, институтравун увксса буттахъун иривунна къалиян тий. Мунийн сси бивзсса буттал на ца зуруй ми арцуца увсарра.

Мукълчинмур курсирай, «Дагдизель» заводрай технологитал аьркинну бур тий, тиккун занай буссияв. Ттул дипломрал защита дуллалисса чумал, комиссиялул председателну ия Асваров тисса Ленинградуллал жамирду байсса институтрал Дагъусттаннайсса филиалданул хунама. Мунал, ттул дипломрал даврий дак даркуну, на цацана зун увцунав. Микку цал техникну, яла инженер-технологну зий ивкIра. Мичча увцунав Лухи хъбирил флотрай къуллугъ буллан. Зана хьуну махъ зун увхра Домостроительный комбинатрайн. Шичар байбивхусса ттул захIматрал ххулулу. Зий ивкIссара, электрослесарная айивхьуну, арматуралул цехрал хьунаманийн иянинн.

Яла на профкомрал председателнугу увчунув. Мичча тIайла увккунна Дагъусттаннал профсоюзрай производствалул отделданул инструкторну. Мунияр махъ уссияв энергетиктурал профсоюзрал обкомрал жаваблувсса секретарьну, «Дагэнерго» объединениялул председателну, генеральный директорнал хъиривчуну, «Дагэнерголул» хьунаману. Мукунна на ххюра шин дурссар Пятигорскалий Ухсавнил Ккакказуллал управлениялий.

- Абдулхаликъ, буси вила ужагъраятугу.

– Ттул кулпатрайн Тамара учайссар. Сант дирирну дунура, дакIнийхтунусса барчаллагъ учивияв ванихъ, аьпалул хьусса ттула ниттил хIурмат-къыматрай бивкIсса, тачIав мунихъ кIусса жуав къадурсса.

Ттул уссар шама арс. Хьунама арснал Асланнул (ттула дус Аслан Хаппалаевлул цIар) школа къуртал бивсса чумал, кулпатраву ца хIакин икIан аьркинссар

тIий, на маслихIат бувссия Мединститутравун уххан. Амма мунал юрист хьун ччан бивкIунни. КIилчинма арс Абдулаьизилунгу ччан къабивкIунни хIакин хьун. Ваная экономист хьунни. Вайннал КIинналвагу заочнайну бивккунни энергетикалул институтру: Асланнул – Москвавил, Абдулаьизилул – Дагъусттаннай. Чивима арснал Тамерланнулгу увкунни: «Нагу экономист ягу юрист хьун ччай ура», – куну. Муни на учав: «Ина ягу армиялийн гьантIиссара, ягу Политехнический институтравун электричествовалу системарду лахъхъийсса факультетрайн уххантIиссара», – куну. Шивун уххан рязи хьунни. БучIиссар ва ттул шаттирдайх лавшиврун ккалли ан. Тухумраву хIакин хьуну ччисса ттул хиял бартлаган бунни уссил арснал АхIмадлул.

- Душ бакъавиврий хIайп тIунгу икIарав?

– На къаучивияв ттула душ бакъассар куну. Ттул урчIва душ буссар, шанна – арснал шар ва ряхва – арсурвалрал душру.

- Ишлану буриг зул къушлий лакку маз?

– Жул нитти-буттал ужагърай байсса ихтилат лакку мазрай бакъа къабайва. Ттул ца цинявпагу лакку мазрайсса словарьду буссар. Лакку маз ишлану бикIаншиврул лакрал шаэртурал луттирду ккалан икIара. Ттул библиотекалулу лакку мазрайн таржума бивсса Оьмар Хайямлул лу буссар. ХIарачат буллан икIара ихтилат лакку мазрай буллан. Вих хьанан къабикIай на шагърулий увсса, хьуна хьусса инсанни тий. На чIавуну мажлисирттал тямдану итара. Лакрал мажлисирттайсса ихтилатругу лакку мазрай бара. ДакIний бур Гъаза Гъазаевлул 85 шинал юбилей кIицI лагалисса мажлис. Та чIумал на, ганан ххуйсса коньякгу бахшиш дурну, 90 шин хьусса чIумал хьунабакIинтIиссару жува увкуссия. Гъашину Кисловрайн игъалаган лавгсса чIумал оьвтIий ур Гъаза: «Вин дакIний буриг ххюра шинал хъхъичI инава буллусса махъ. Гьунттий на вих ялугълай ура ттула 90 шинал юбилейрайн», – тий. На шийх акъасса кIул шайхту, Гъазан къащи хьуна. Яла пикри бав, му оьрмулийн ивсса адаминан къаччан бикIан къабанна куну. КIюрххил ссят арулунний увккун, увкIра МахIачкъалалив. Къаучанссар тIий ивкIсса Гъаза, на ккаккайхту, ххишала акъа ххари хьуна. Махъ буларду 95 шинавугу укунма хьунабакIин.

Лакку мазрая ихтилат багънавхьур, дакIнийн бутанна ца укунсса ишгу. Армиялий къуллугъ буллалисса ппуртгугу, ниттил бивкIуна лакку мазрай чивчусса чагъар. Нину ххари дан нагу лакку мазрай жаваб чирчуссия. Ца ппуртгугу ттулчан бивкIунни шаппату чагъар. Ургарчан, ниттил ссурахъил ттул цинявпа гьалатIругу бакIин бивну, ятIул бивсса чагъар ттулчанма махъунмай гьан бивну бия. Яла, ттунна нач хьуну, армиялийн лакку мазрайсса луттирду гьан бара куну, тавакъю бувссия. Ми ккалайгу ивкIра бусса чаралуцIух.

Юбилейрашал барчагу улай, чIа тIий буру Абдулхаликъ АьлиевичIун цIуллушиву, кулпатраву нахIу-хIалимшиву. ЛичIаннав ина вила кулпатраятугу, наслулиягу шалихханнин.

**Андриана АБДУЛЛАЕВА
Имара САИДОВА**

Агъали давурттал дузал баврил цIаний

Ларгсса нюжмаркъини МахIачкъалалив «Аьрасат – ттул тарих-Лари» тIисса музейраву хьунни давуртта луглагимигу, давурттал шаллу буллалимигу цацIун буллалисса «Работа России. Время возможностей» тIисса шалагу Аьрасатнал вакансиярттал ярмаркалул цалчинмур бутIул даву.



Имара САИДОВА

Шикку гьуртту хьунни ДР-лул вице-премьер АьвдурахIман МахIмудов, ДР-лул захIматрал ва лябуккулул министр Мурад Казиев, ДР-лул машлул ва промышленностьрал министрнал цалчинма хъиривчу ХIажимурад Исрапилов ва цаймигу.

Ярмаркалий бия Дагъусттаннайсса 80-хъул хьунисса машлул ва промышленностьрал предпритиярдаьсса вакансияртту.

«Ва хьуннасса меропритие даврил агъаммур мурад хъанахъиссар пишарду язи бугъан кумаг баву ва агъали давурттал дузал баву. ХIакъину шиккун бивкIсса инсантураща бюхълай бур 500-нийн бивсса вакансиярттава аьркинсса пиша язи бугъан», – увкунни АьвдурахIман МахIмудовлул.

Пишарду язи бугъаву бакъассагу, вакансиярттал ярмаркалийн бивкIминнаща бюхълай бия давурттал дузал буллалисса ишбажаранчитурашл ихтилатругу бан, пишардал кIулшивуртту дулаврил идарарттай дуклакиминансса меропритиярдай гьуртту хьун.

Студентьтал, выпускниктал ва нину-ппу, ишбажаранчитурахъ цIухху-бусуртту буллай, кIул буллай бия цивппа заллусса давуртту тIитIлатIиминнансса кумагирттая.

Цанасса чIумал тIалавшинна дусса пишардал презентацияртту дунни республикалул кIулшивуртту дулаврил идарарттал вакилтурал.

Му бакъассагу, ярмаркалийн бивкIминнаща бюхълай бур пишардал даража гъаз бан ва цаймигу пишарду лахъхъин.

Цивппа заллусса даву тIитIин ччиминнан кумаг хIисаврай, опыт кIибавчIунни цанасса заманнай хъхъичIунну зузисса хъанния бусласисса «Я все могу» тIисса ма-рафондалий.

Ярмаркалул даврил лагрулий хьунни «Новая реальность в сфере занятости молодежи: от профессионального самоопределения до адаптации на рабочем месте» тIисса, дахъва даврийн бивкIсса жагъилсса пишаркартуран маслихIатругу буллалисса ккуркки столданул даву.

Ва ххуллухъсса вакансиярттал ярмаркалий гьуртту хьунни 3000 инсан. Вакансиярттал ярмаркалул кIилчинмур бутIул даву дайдишинтIиссар июнь зурул 23-нийн.

Ярмаркалул федерал бутIун хасъсса «Работа России» тIисса порталданый кIул бан бюхъантIиссар регионанайсса давурттал дузал буллалисса хъхъичIунсса ишбажаранчитура.

Гихуннайсса вакансиярттал ярмаркалийгу бикIантIиссар студентьтуран, выпускниктуран цанасса оьрмулулу тIалавшиннарду дусса пишарду язи бугъансса маслихIатругу буллалисса эксперттал.

ДакIнийн бутанну, «Демография» миллатрал проектрал лагрулий агъали давурттал дузал буллалисса къуллугърал даву цIудуккан даву мурадрайсса проект иширайну зузи дурну душиву.

Вузирдавунсса квотардал шанма жура

Дагъусттаннал Дуккавил ва элмулул министрствалул абитуриентьтуран баян бунни цIушиннардаь. Гъашинуния тийнмай вузирдавун дуклан буххан ччиминнан ккаккан буллалиссар квотардал шанма жура.

П. РАМАЗАНОВА

Специальная квота – ва аьралитурал ва аьрайн бивцуминнал, хасъсса аьралий иширттаву гьуртту хьуминнал оьрчIанссар. Бюджетрал кIанттурдаву ва квоталун 10 % ккаккан бивну буссар. КIилчинмур журалийн особая квота тIий бур, ва мушакъатминнансса ва ятинтурансса квотар. Ванингу бюджетрава 10 % ккаккан буллалиссар. Шамил-

чинмур жура – целевая (аьшуйн шуну учин, квота на целевое обучение). Ва паччахIлугъран чара бакъа аьркинсса касмурду лахъхъин ччиминнанссар: педагогтал, хIакинтал, инженертал. Так ва квоталийн дуклан увхма вуз къуртал бувайхту цува дуклан тIайла увксса идаралий зун аьркинссар шанна шинай. Зулва оьрчIуру вузирдавун дуклан буххан хIадур хъанай бухьурча, уттива зунна дагъайсса квоталул хъирив буккияра.

Имам Шамиллул цанийсса Ухсавнил Ккакказуллал Чяру профили дусса гуманитар колледжрал гъану бивзун дахра 5 шин хьуну дур. Чирисса чумул дянив колледжрал лайкьсса кІану бугьуну бур республикалул кІулшивуртту дулаврил идарарттал дянив. Чявуну баллалисса колледж ххал бансса, ванил даврия, дуклакиминная цІухху-бусу бансса мурадрай, ттул аьрххи багьунни шиккун. Колледжрал кьатраву ттун экскурсия бунни ванил гъану бивзма ва учредитель, юридий элмурдал кандидат, отставкалийсса милицанал полковник Тавлу Казакбиевлул ва фармацевтиялул кафедралул каялвучи Тимур Ибрагьимовлул.

Майжаннугу, шикку дуклакиминнан ва узиминнан, цІуллусагьшиврул ссуескушвиу дусса студентьталгу хІисавравун лавсун, шаллу дурну дия циняв шартІру. Бия гъарица аьркинмунил дузалсса кабинетру. Най буна хІисав хъанай бия колледжрал давриву хъуннасса кьулагьсрайн лавсун бушиву дуклакими тарбия баврил масъала. ЛяличІинура кІицІ лагавияв шиккусса, жяматрал ва политикалул ишккаккулт, элмулдул, искусстволул, спортрал ххуллий лайкьшивуртту дурсса цинявпагу миллатирттал вакилтал бусса ххаллилсса стендру. Вай ххал кьадурну цучІав чІарах кьагъанссия.

Колледжрал кьатри ххал дурну махъ ттул ихтилат хъунни 2019 шиная шихунай шикку фармацевтиялул кафедралий каялвучи дуллалисса фармацевтиялул элмурдал кандидат, АлхІасаннул арс Ибрагьимов Тимурдушал.

- Тимур, цукун тІайла авцІура ина ва колледжравун? Ци учинна шиккусса дуккавил процесрая?

– Колледжрал учредитель Тавлу Казакбиевлуштал на кІул увнав ттула коллегал. Най буна чІалан бивкІуна ва дуккавил масъаларттая арх акъасса, цала дуллалимур кІанийн дуртун дайсса, гъира-гъавас ххисшалайсса инсан ушиву. «Колледжраву фармация яла бюхттулмур даражалый дикІан аьркинссар» увкусса ванал махъругу ттун асар хъуна. Ванавусса гъира-гъавас най буна ттувунгу багьуна. На ва колледжраву вузирдал даражалыйсса, цимурцаннул шаллусса лабораторияртту сакин бивссар. Вай жул колледжрал пахрулунасса, ччинал хъхьичІун ласун бюхбайсса лабораториярттур. Шиву жу студентьтурашал личІи-личІисса даруртту байссар. Дайссар препараттал экспресс-анализ.

Фармацевттал хІакьину тІалавну бур захІматрал рынокрай. Жул цинявпа студентьтурал шанма бутІа ва пиша лахьлахьисса бур. Жу хІарачат барду вайннан куртІсса кІулшивуртту дулун, ххуйсса пишакартал хъун бан.

Жул студентьтал, 2-мур курсрая байбивхъуну, аптекардай зий буссар. Шиккува кІицІ лаган, колледжраву лавайсса даражалый шайссар республикалул олимпиадартту. Ларгсса шинал шикку хъуссар республикалул медициналул колледжирттал дянивсса олимпиада. АцІунния личчусса командартту гьуртту

Жул интервью

Дуккавил идарарттаву хъхьичІмур ххуттай



Тимур увну ур Шуссалакрал райондалий Шуссалакрал шяраву. 1987-ку шинал школагу кьуртал бувну, МахІачкьалаллал медициналул училищалувун увххун ур. Кьуртал бувну бур, аьралуннаву кьуллугь бувну увкІун махъ, 1991 шинал, марцІну ххювардай. Ца шинай зийгу ивкІун, увххун ур Пятигорсккалал фармацевтиялул академиялувун. Му кьуртал бувну махъ зун ивкІун ур Дагьусттаннал университетраву химиялул кафедралий лаборантну, архала элмийсса ахттаршиннардахунгу агьну. 2021 шинал лайкьну дурурчуну дур элмурдал кандидат хъунсса диссертация.

2013 шиная шихунай Тимур зий ур Аскерхановлул цІанийсса медициналул колледжраву. 2015 шинал зун ивкІун ур Дагьусттаннал медициналул университетраву, махъ тІивтІусса фармацевтиялул кафедралий.

2019 шиная шийнай зий ур Ухсавнил Ккакказуллал Чяру профили дусса гуманитар колледжраву.

хъусса олимпиадалий жул студентьтал чІаланну хъхьичІун бувккунни. Мукуна цалчинсса кІану бугьуссар жул студентьтурал цалчинсса медициналул кумаг баврил олимпиадалий.

Жул выпускниктал ЕГЭ кьадулунува кьамул байссар ччимур вузравун. Колледжраву мукуна шайссар республикалул, Ухсавнил Ккакказуллал лагрулийсса спортрал бяст-ччаллу. Жул студентьтураву буссар республикалул, СКФО-лул, Аьрасатнал ва дунияллул чемпионтал. ЖучІа зузисса шама тренернава кІия дунияллул даражалыйсса спортрал мастерталли. Хъуннасса кьулагъас дуссар студентьтал Ватан ххирану тарбия баврих. Цуксса хІайпнугу, ца жул студентнал – ХІажимурад МахІаммадовлул жан дуллуни хасъсса аьралий операциялий. Уттигъанну колледжраву дурссар муна хас дурсса аьпалул вечер. Жул студентьтурал хъуннасса гьурттушинна дурссар аьралитуран, мукуна Донецкалал ва Луганскалал халкьуннан гуманитар кумаг бавриву.

- Аьмну циксса студентьтал бур колледжраву? Чявучил язи бугьлагьимур ххуллу цумур бур?

– Фармациялул хьирив сийлий бур медициналул ссурвал хІадур байсса отделение. ХІакьину колледжраву дуклай бур азарунния ливчусса студентьтал, сайки бачІи ва отделениялий бур.

Цал ттигу кІицІ лагавияв, жучІа лавайсса даражалый хІадур буллаи буссар медициналул зузалт. Кафедралий каялвучи дуллаи буссар медициналул элмурдал доктор, профессор Зарема Кьурбанова. Гъарица цІуну дурксса приборду, оборудование га цІана ласайссар колледжран.

Утти жучІа фельдшертал хІадур байсса отделениегу тІитІлатиссар. Ялагу жучІа хІадур буллалиссар ихтиярду дурччай сфералуву, юриспруденциялул ххуллий зунсса пишакартал, социал зузалт, байбихьуллул классирттал ва физкультуралул учительтал.

- Гъашину зул колледжрал юбилей хъанай дур. Ци учинна гъану бивзния шихунмайсса зула тарихрая, ккаккьярттая?

– Колледж тІитІинсса пикри хъуссар Тавлу Казакбиевлун. Дагьусттанлувтуран ва кІулссар хъхьичІунсса политикалул ва



Жул колледж хъанакъиссар пиша лахьхьайсса ва кІулшивуртту дулайсса коммерциялул бакъасса идара. ЖучІасса дуккаву багьлухсса духьурчагу, шикку дуклан буххан бюхълай бур ахІвал кІюламиннацагу. Шинайсса дуккаву 35 азарунния 60 азаруннийн дирсса дур.



жяматрал ишккакку хІисаврай. 1998-2005-ку шиннардий Госсветрал члену ивкІссар. Виваллил иширттал органнаву зий 35 шин хъуну махъ, Турциянавусса Аьрасатнал Машлул представительствалийн Дагьусттаннал вакилну гъан увсса чІумал, ванан хъинну кьулай дирзун дур тийхсса дуккавил система. Пикри хъуну бур жува аьдатсса кьядардая архсса, «телефонное право» кьаишласса дуккавил идара тІитІин жучІавагу. Жул колледж хъанакъиссар пиша лахьхьайсса ва кІулшивуртту дулайсса коммерциялул бакъасса идара. ЖучІасса дуккаву багьлухсса духьурчагу, шикку дуклан буххан бюхълай бур ахІвал кІюламиннацагу. Шинайсса дуккаву 35 азарунния 60 азаруннийн дирсса дур. Яла-яла кІицІ лаган ччива, багъа буллуссар куну, студентьтуран бигъанма кьиматру бихълай бакъассар. Дуклан кьаччима тІайла уккайссар.

Тавлу Казакбиевлуштал архІал колледжрал гъану бизлай

хъунмасса захІмат бивхьуминнавух кІицІ лаган ччива цаппара цаймигу цІарду: профессор Зарема Кьурбанова, экономикалул элмурдал доктор, профессор Расул Кьадиев, химиялул элмурдал доктор, профессор ХІасан Абакаров, Аьрасатнал Виричу (праволул кафедралий каялвучи дуллаи уссар) Загьид Загьидов, тарихрал элмурдал кандидат Ольга Казакбиева, юридий элмурдал кандидат Лилия Тавлуевна.

Жул коллективраву 3 элмурдал доктор, 16 элмурдал кандидат ва 3 доцент уссар. Ххюя инсан уссар хІурматлувсса цІарду ларъсса. ЖучІа зун конкурсерал гъанулий кьамул байссар.

Хъунмасса хІарачат буллалиссар жул преподавательтурал студентьтуравун дуккавилрхсса гъира бутан, лавайсса даражалул пишакартал хІадур бан. ХъхьичІунсса студентьтуран цІа кусса стипендияртту буссар.

Колледжрансса кьатрал чулухагу жун тІайлабацІу хъуссар. Вай ххюя зивулийсса кьатри дурну дур вузрансса проектрай республикалий ххуйну кІулсса аьлимчу, Аьрасатнал Дуккавил академиялул академик Оьмар Оьмаровлул цила чІумал, Москвауллул университетрал филиал тІитІинсса пикрилий.

Жун шикку цичІав даххана дуллан кьабагьунни. Гъар аьркинмунил дузалсса циняв дарсирдал кабинетру буссар. Буссар даруртту байсса лаборатория, судрал заседанияртту дайсса зал. 2021 шинал жул колледж багьссар Аьрасатнал хъхьичІунсса

кІулшивуртту дулайсса ттуршва идаралул сияхІравун.

- Колледжран имам Шамиллул цІа дизансса пикри цукун хьур?

– Му пикригу жул учредительнан багьунни. Ва буслан икІай, Туркнавусса чІумал махІаттал увну ивкІра тайннал халкьуннал жула миллатрал виричу имам Шамил лахъа-хъун уллалисса куццул тІий. Шайх Шамил тІий кІицІ дайва тІарванал цІа. Му зат асар хъуну, ва, Османнал империялул архиврдавусса материалгу ххал дуллаи, Шамиллуя гъартагъарзану кІул буллан ивкІун ур. Тиха ва увкІун ур имам Шамиллул цІа республикалул визитная карточка хъанакъивирий мукІруну. Колледжраву утиния тиннайгу цаппара ххуй чулиннайсса дахханавивуртту дан дакІний буссару. Цалсса миннуя кьабусланна.

- Барчаллагь, Тимур. Зу дуллалимуніцІун Занналу кабакьиннав.

Ихтилат бивссар
Андреана АБДУЛЛАЕВАЛ

Ларгсса нюзмаркыни Мубараксса Рамазан зурул гьантрай республикалийн увкIун ия Каирдал Хьун мизитрал имам, Кьуран букку, машгьурсса нашидру уку, Египетна-васса шайх Мустапа Атеф.

Имара САИДОВА

Дагъусттаннайн ванайн овькуну бия Дарбантлив хьунтIисса республикалул даражалийсса ифтарданий гьуртту хьун. Сант дирирну дунура, Мустапа Атеф увкIунни МахIачкьалаллал Хьун мизит ккаккан, таравихI чакбан, дуаьртту дуккин. Бунилла-

Аьрххи цава, ххуллу кIива



гу, асар хьунсса такьвалий дуркунни ванал таравихI чаклил дуаьртту.

Хьиривмур кьини Мустапа Атеф хьунаавкьунни Дагъусттаннал гуманитар институтрал каялувчитурашал. Ректор НухIкьади Бахмудкьадиевлул бувсунни вузрал даврия.

Атефлул кIицI лавгунни, Дагъусттаннайнсса цалчинсса аьрххилия пашман кьавхьушиву ва хьинну ххарисса асарду хIасул хьушиву.

Ва хьунаавкьунни вузрал сту-

дентьтурашалгу, бувсунни вайнахь цала даврия. КIул хьунни студентьтуран ва, нашидирттайну акьассагу, Кьуран лахьлай, исламрал элмурдахун куртIну агьсса инсан ушиву.

Гьирарай дуллунни ванал студентьтурал суллахьхьунсса жавабругу. Хьунни вания монпатсса ва дакIний личIансса хьунабакьаву.

ДГИ-лул ректорнал бусравсса хьамаличунан дуллунни дакIний личIансса бахшиш.

Коррупциялийн кьарщину бацIаву

Коррупция саванну дуньялул чIавусса билаятиртташа бюхьлай бакьар хьхьичIунмай хьун, экономикалул кризис дух дан. Коррупция – му дур кьуллугь ва буржру цакьлин бугьаву, дулттурасри дулаву ва ласаву, паччахIлугьрал ва жьматрал кьануннайн кьарщи бувкIун, паччахIлугьрал кьуллугьру машан ласаву, цала ва цалайриннал хайрданун кьуллугьру ишла булалаву.

Кьуллугьчитурал агьалинал чулухуннайсса тIайладакьашиврул, кьуллугьрал буржру тIайла бакьа ишла булалавил паччахIлугьрава ва властьрава агьалинал дакI дуккан дуллалиссар. Мунийну ишбажаранчитурал дянивгу инвестицияртту дихьансса гьира лешан буллалиссар.

Цуксса хIайпнугу, коррупция илкинну ппив хьуну дур бусурманнал дянивгу. МуницIун бавхIуну шил-бунугу пикри бан бюхьай, исламрал мяьрипатраву духьунсар ци-дунугу коррупциялуцIун кабаку буллалисса тIисса. Дакьассар! Бусурман агьулданул жьматраву коррупция тутIайх дичлачаврил барашинна дуллалиссар, ми исламрал кIулшивурттайн шаллуну вихну бакьашиврул. Исламраву гьарца инсаннал буржну хьанахьиссар власть цакьлин дугьавринсса ххуллу кьукьин. Мукунсса иширттаву агарда цамур ххуллу лякьин кьабюхьлай бухьурча, бучIи буллай бур хIатта хулагума. Коррупциялийн кьарщи буккан аьркиншиврия, муниципун дархIусса тIуллай кьадагьа дихьлан аьркиншиврия чIавусса чивчуну бур лавгзаманнул ва ттизаманнул диндалул аьлимтурал. Идавсил (с.аь.с.) чIавусса хIадисру мисалну бучин бюхьлай бур, Ислам коррупциялуцIул цукун талай дуссарив. Идавсил (с.аь.с.) хIадисрацIун бавкьуну, гьарца паччахIнай, бакIчинай, каялувчинай – агьалинал ахIвал цал кIунттихь бусса цума-цагу инсаннай дуссар гайннал ахIвалатрал, цала тIуллал

жаваблувшинна.

Абдулагь ибн Умардул бувсун бур цанма бавну бивкIшиву Аллагьнал тIайла увкмманал тIимур: «Зул дянивсса гьарма бакIчире, гьарманай дуссар жаваблувшинна. ПаччахI жаваблувсар цала умматрах уруган. Адамина буржлувсар цала кулпатрах уруган. Хьамитайпа буржлувсар ужагьрах буруган (аль-Бухари, Муслим).

Абу Хурайлул хIадисрай бувсун бур Аллагьнал тIайла увкмманал ца базилух увкумур: «Аллагьнал чара бакьа жаваб ласунтIиссар гайннайту (бакIчитурае) гьарзатрахлу» (аль-Бухари, Муслим ва цаймигу). Агарда инсан тIайла акьа цала буржру биттур буллай ивкIхьурча, ганан оьсса танмихI кьукьинтIиссар.

Аль-Бухарил бувцусса хIадисрай баян буну бур Аллагьнал тIайла увкмманал увкумур: «... агарда га цала агьалинай дакI аьтIий акьахьурча, ганан Алжаннул кьанкьрагу кьаришунтIиссар».

Халкьуннал ялув власть думиннай Идавсил (с.аь.с.) дирхьуну дур кьанкьасса дюь – цала кIунттилуминнай кьия кьадуллан. Идавсил (с.аь.с.) Сунналийн буну, Ганал ххуллийх наними бивкIсар паччахIтал бакIрай бацIан буллай, гайннан Идавсил (с.аь.с.) увкумур баян буллай, власть коррупциялуца дуруччиншиврул. Бувсун бур Идавсил (с.аь.с.) ххуллийх наниминава ца яла тIайлама Аьзбин Амр увкIун Убайдуллагь бин ЗийадлуцIан (Язид ибн Муави-

нал заманнай Басра шагьрулий омейядтурал халифатрай каялувшиву дуллаи ивкIсса), ганахь увкуну бивкIшиву: «Я, арс, ттун бавсар Аллагьнал тIайла увкмманал увкумур: «Яла оьккими бакIчитал хьанахьиссар рахIму бакьами, – урувчуну икIу миннавасса ца инава кьахьуншиврул!» (Муслим).

ПаччахIлугьрал кьуллугьирттайминнал цала мурадур биттур кьабулланшиврул ва коррупциялийн кьарщи ацIаншиврул, Аллагьнал тIайла увкмманал каялувчитурал кьуллугьирттай кьабитайсса бивкIсар цахьва му кьуллугьрай бити тIими, хаснува га инсаннаву каялувчинал диКIан аьркинсса хасиятру дакьахьурча.

Абу Заррал бувсун бур ца базилух цува Идавсийн (с.аь.с.) увкун ивкIшиву: «Я, Аллагьнал тIайла увкма, кьаитаннав ина на ссал-унугу каялувчину?» – тIисса маслихIатрашал. Муни-сса жавабран Идавсил (с.аь.с.), ттул хьачIрайх хьатгу риршуну, увкуна: «Я, Абу Зарр, тIайламур баян ччарча, ина хьхарасса ура, власть тIурча – му аманатри, му цума-цагу инсаннан кьюкьалану кIура даентIиссар, так му власть багьавай хIалал дурсса ва бакIчинан дан багьаймур дурсса инсаннан личIаннин» (Муслим).

Коррупциялийн кьарщи бацIаву – му так властьрал ва низам дуруччай органнал бурж бакьар. Му шала жьматрал буржри. Мунияту ххуйну пикри бара кьуллугьчинан дулттурасса дулун хьхьичI. Бунагь кIиннайвагур хьунтIисса – дуллуманайгу, ларсманайгу. Му хьинну оьсса тIул дурну, жура жунна хьинну хьуннасса нигьачIаву рултатиссару.

Билаят экономикалул кризисраву личIан баву бакьасса, коррупциялул паччахIлугь ва жьмат хьхьичIунмай хьун кьабитайсар.

НурмухIаммад ИЗУДИНОВ

Таржума

Зулайхат ТАХАКЬАЕВАЛ

Аьпалул махъ

Лавайсса даражалул пишакаргу,

уздансса хьамитайпагу

Шин ларгунни жула дянива ххаллилсса хьамитайпа, миллатрал хIакьсса патриот, ТтурчIиял шьравасса Хьунбуттал ва Аьйшал душ Акаева Уляна личIи хьуну.

Имара САИДОВА

Уляна бия итхьяхьсса, цила даву ххуйну кIулсса профессионал, лавайсса интеллигент. ХIадурсса бия мюхтажнан ка-кумаг бан. Гьарца ишираву тIайлашиву ччисса, даччин дакьа цума-ухьурчангу хьунаманнахь сивсуну махъ учин кIулсса бикIайва. Цумур-духьурчангу, цила бакIрайн ларсьсса даву дузрайн дуккан кьадурну бигьакьалагайва. ХIайп, циксса хияллу, мурадур барткьалавгунма, дьзаннив ливчIхьунсар.

Уляна буну бур 1955 шинал Цуссалакрал райондалийсса Цуссалакрал шьраву.

– Кулпатраву Уляна чIанма-чIивимур бивкIнугу, ванил хьунма-хьунмунил куннасса хьар лахьайва. Шанма ссу ва мукьа уссу бия жул. Жула ужагьирттай, кулпатирттаву ссал-бунугу ялув буруккин багьсса чIумал, Улянал, пикри мабару, мунилсса на байссар куну, рахIат буккан байвав. Жун кIулссия Улянал гьарца ишираву ххуллу лякьинтIишиву. Аьркинну буруча, нанира куну, жу циньва ца ссупралухун багIайва», – тIий, буллай бур ванил хьунмур ссу Уди.

Улянал хьхьичIунсса хIа-силлашал кьуртал буну бур Дагъусттаннал паччахIлугьрал университет. Шивугу ва бивкIун бур ца яла итталумур студент душну, группалул старостану, альпинизмалул спортрал мастерну. Дуккаву кьуртал дурну махъ зий бивкIун бур ЦуссачIуртташьял школалий физикалул учительну.

Учительну зузисаксса хIаллайгу коллегьхьал ва дуклаки оьрчIал дянив бусравну ва ххирану бивкIун бур.

Тамансса шиннардий Уляна каялувшиву дуллаи буссия райондалул комсомол организациялий. Шиккугу ва жагьилсса никиран насихIатчи ва дакI тIайласса дус бия. Райкомрал инструкторну зузисса чIумалгу Уляна, инсантуран



Уляна Акаева

цишава шайсса кумагру буллай, ххуй-ххуйсса иширттайну дакIний ливчIун бур.

Улянал хьунма гьунар бия журналистикалул давривугу. Цила бюхьугу, даражагу ккаккан бувссар ванил «Заманалул чIу» тIисса райондалул кказитрал редакторну зузисса чIумалгу. Муния махьгу цуппа зузисса жаваблувсса кьуллугьирттайгу исват бувссар ванил цилва пагьму-гьунар.

1999 шиналгу, Цуссалакрал райондалийн кьини дурксса гай яла захIматми гьантрайгу, нигьццах дакьа, ванил чIалачIи дурссар цила чувшиву. Дагъусттаннал аьршарайн ххяхьсса чапхунчитал хит бавришун дархIусса юбилейран хасну Аьрасатнал Президент Владимир Путиннул Уляна Акаеван дуллулар «За отвагу» тIисса медаль.

Махьсса шиннардий Уляна зий буссия шагьрулул Кировлул райондалул администрациялул управлениялул даврий. Ва бия, бунилагау, гьарца ишираву тIайлану кьущу бан, даву сантирайн руртун дуван кIулсса пишакар, дакI-аьмал авадансса инсан.

ХIакьинусса кьини ва дакIнийн бутай ва ванил цIа бусраврай зумух ласай архIал зий бивкIминнал ва райондалул жьматрал.

Спорт

ХьхьичIунми кIанттурдай

Дагъусттаннал лачIунбуккултрал Якутскалий юниортурал дянив хьусса Аьрасатнал первенствалий 11 медаль дурххунни.

ХIасан АьДИЛОВ

Муний ххув хьунни тIалхIат Аьбдулкадиров (65 кило), МухIаммад-ТIагьир ХIаниев (86 кило) ва Сяид-ХIасан АхIмадов (125 кило).

Арцул медаллан лайкь хьунни Халид МахIаммадов (57 кило) ва ХIажимурад ХIажиев (65 кило).

Шамилчинми кIанттурду бувгьунни ХIабиб Магьдихановлул (57 кило), АхI-

маднаби Убайдуллаевлул (65 кило), Алу Духаевлул (74 кило), МахIаммад ХIамзатовлул (74 кило), Юсуп Шаиповлул (86 кило), ХI-биб ДавудхIажиевлул (125 кило).

Баян

РедакциялуцIун дархIусса тIалавшиннардайн буну, «Илчилий» бишлашисса жижарартгал текстру буссар укунсса багьрал лагрулий: укунма жижара – 200 кь., сурагьрашисса некролог – 500 кь.

«ИЛЧИЛУЛ» редакция

Лакрал халкъуннал учаларттава

Оьндий бувсса къавгу, чIу-муй бувсса ташугу хьинссар.

Хьинсса чан мархъ галай баву гьассар.

Ссавур – ятIул мусири.

Оьсса каччилли къатта баййсса.

Хьинсса авчинал цинья ккулларду бивтун къуртал къабайссар.

Хьут дичин чIатIагу, ницI дукан къусагу ца мурхьираяй дайсса.

Ниттил зай оьрчIаха къабацIайссар.

Нитти-буттан оьрчIал бувмур оьрчIал оьрчIал зана байссар.

Инава ниттин кунмассар винма вилами оьрчIругу хьунтIисса.

Нину (хьамитайпа) – оьрмулул бакIшарацир.

ОьрчIансса алжан – ниттил чIаннацIри бусса.

Бавкъусса кулпатравур ххуйсса оьрчIругу шайсса.

ХхуллуцIсса хьоруерал хьугу, бакIрал ххуйсса щарссагу ядан жапассар.



Табиаьтрал низамрайн буну дуркIунни инт – аьрши ххираминнан буллуни давран. Кьаркъсса къяртри-хьичIив къувкъуну, бугьайми мурхьру бувгьуну, бувгьуми кIяла буну махъ хIадур дуллан аьркини аьршараву дугьаймур, вайнул гьанна. Дугьаймур укунна аьршаравун дирчуну кьаритаяр, ххуйсса бакIлахьия ласунсса ххишаласса хIарачат бунан аьркини жува.

Чимус

Чимус (шюллишиврун бикIу, бакIру хьун бунану бикIу) къабугьайсса хьузала нажагьсса акъа акъахьунссар. Бигьанна ххяххан дувайсса ва ахьнилссаннулгума цал-цал бюхъай лашинсса бакIлахьия дулун. Мунияту, чимус бугьлайнагума итгалу бугьансса кIанттурдугу бур.

Чимус бугьан аьркинссар аьрши 10 см куртIшиврий 11 градусраяр лагь дакъасса температуралул гьили хьуну махъ.

Чимус, бюхъавай, бугьан къабучIину бур хьхьичIмур шинал чимус цуппа, лаччи, хъахь кьур, сельдерей, къая бувгьуну бивкIсса кIанай.

«Илчи» – маслихIатчи АхъницIунсса маслихIатру



Чимус ххуйну ххяххайссар нувши, хьюрув, помидор, бадиржан, болгар перец, къавахъ бувгьуну бивкIсса кIанай.

Бугьан нанисса чимус гьилисса кIанай ябуван аьркинссар. Бугьан нюзмардул, кIиннил хьхьичI хIатта лавхьсса батареялчуа, пачличIагума бивхьуну хьинссар.

Бугьан аьркинссар аьллан къабивкIсса, аьй дакъасса, кIукIлу къалавгьсса чимус.

Чимусун къаххирассар къурчIисса ва ларсса, мукунна шин дацIлацIисса лагьсса кIанайсса аьрши. Аьрши къурчIисса душиврул лишаннурив дикIайссар укунсса: ялттусса мяххилул уртту, ялттусса чаннасса къат, хьунтIуллив дагьсса кIанттурдай даршусса сси багьсса шин.

Чимус бугьан аьркинссар баргъ ххуйну биллалисса, хьатругу тарисса кIанай.

Чимусул бакIру хьуниссаксса кувничIату кув архну бувгьуну хьинссар, мюршими – гьанну.


Чимус къаярашал чIаххуврай бувгьуну хьинссар. Чимусул чIаравсса къая хьиннува нахIусса шайссар.

Чимус лув-ялув 3-4 шинай цава-ца кIанай бугьан къабучIиссар, ванил лап чIукъа дуккан дувайссар аьрши.

**ХIадур бувссар
Бадрижамал АБЛИЕВАЛ**

ЧIунлахъиялун

КIяламиннул 2 ходрай мат дихьлай бур.



1. Крп2. Лf7х
2. Крп2. Лf7х

Ххирасса «Илчилул» буккулт!

Баян буллай буру дайдирихьшиву 2-мур дачИ шинайнсса «Илчилул» подписка.

ЧИЧАРА ККАЗИТ

Федерал почталийх:

- дачИ шинайсса - 523 къ.
- зуруйсса - 88 къ.

Дагпечатьрайх:

- дачИ шинайсса багъа - 183 къ.

- зуруйсса - 31 къ.

«Почта России» сайт-райхчин

<https://podpiska.pochta.ru/press/P7046>


- дачИ шинайсса - 523 къ.

- зуруйсса - 88 къ.


Редакциялийхчин Дагьусттаннал дазул къатIув:

- дачИ шинайсса - 1375 къ.
- зуруйсса - 230 къ.


МАХIАЧКЪАЛА




ДЯРКЪУ-ГЬИЛИШИВУ (°C)




МАРЧ (м/с)




ГЪАРАЛ(мм)



Гъавалул тагьар




ДЯРКЪУ-ГЬИЛИШИВУ (°C)



МАРЧ (м/с)



ГЪАРАЛ(мм)



ГЪМУЧИ



Газета «Илчи» (Вестник)

Учредитель:
Агентство информации и печати Республики Дагестан

Хьунама редакторнахлу:
БАШАЕВ Р.М.
Тел. 65-00-07

Кьардашов Р. Ав. Тел. 65-03-12
хьунама редакторнал хьиривма

Редколлегия:
Адамов АбдурахIман МахIаммадович
Аьлиев ХIажи Сулайманович
Исрапилов Артур Анварович
КьурбанмахIаммадов Чанкура Рамазанович
Маммаев Сулайман Нураттинович
МахIаммадов Юсуп ХIамидович
Хаппалаев Аслан Юсупович
Хасаева Гульшан Рамазановна
ХIажимирзаев Зиябуттин Абусупиянович
Шалласуев Шалласу Рамазанович
Эльдарова Роза ХIажиевна

Отделал редактортал:
Аьбдуллаева А. П.
Аьдилов ХI. А.
Рамазанова П. ХI.
Тахакъаева З. К.

Корреспондентьгал:
АьбдурахIманова З. Т.
Аьлиева Б. Д.
Саидова И. А.

Корректор:
АхIамдова А.И.

Кказитрал компьютерданул цех:
Абакарова К. Н.
ХIажиева З. У.

Кказитрай дурксса макьаларттаву кIицI лавгмур тIайлашиврул жаваб дулайссар чивчуманал. Редакция макьалалул залуннал пикрилий рязину бакъахьурчагу, макьала ришайссар, жяматрал паламур пикри бусанссар тIисса ниятрай. Кказитрай дуркIсса макьаларттайн рецензия къачичайссар ва ми залуннахьхьун зана къадайссар.

Кказит буккайссар нюзмардий цал. Шинай итабакъайссар 52 номер.

Кказитрал индекс. П7046
Тираж – 2000 экз.

Адрес редакции и издателя:
367018, г. Махачкала, пр-т Насрутдинова, 1а
e-mail. ilchi@rambler.ru
http://ilchi.info
Тел./факс. 65-00-07

Газета «Илчи» зарегистрирована Управлением Федеральной службы по надзору в сфере связи, информационных технологий и массовых коммуникаций по РД. Рег. ПИ № ТУ 05-00424 от 30.04.2019

Газета «Илчи» отпечатана в типографии ООО «Издательство «Лотос». 367018, РД г. Махачкала, Пр-т Насрутдинова, 1а
Срок подписания в печать 19.00. Подписано 19.00.

Цена свободная



4 651116 280051